

# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM


Kotava, tela tamefa golerava  
Va ina kosmac !!

Bareaksat ke 2024

17<sup>e</sup> otuk



Blira sareon  
gu Abdiizvugal



Kotavaxak dem suterat

Raymond Radiguet

ORETLIK  
KOE ALTO

Derpud (1922)


Kotava, tela tamefa golerava







# Blira sareon gu Abdiizvugal





## Blira sareon gu Abdiizvugal...

---

1. Xeka va ayik towasir
2. Kaba kum inta is brind kum frukti
3. Tey ke kelt
4. Levrotira va tey
5. Rob ke tuwava
6. Sulem iksen
7. Pirtuca ke tcabanesik
8. Brova ke onasik
9. Batinde diola vanbliyir
10. Selasik is tcobasik
11. Gandura va veel
12. Arula is brava
13. Ageltucafa mona
14. Yambudik ke arula
15. Ruzadera va aalxopo
16. Tukwayan dunol
17. Taneaf tawadayik
18. Guemik mo bira
19. Kawaxo dem frukti
20. Raporey is ckant is kepaitakiraf gaest
21. Vegeduropik va ctake
22. Ayik ke lut az iyekot az azil
23. Mali wida kali ralma




## Xeka va ayik towasir

Va int bak muvugal gestil. Moo gozasa keldanya lanil. Kerafe is ebeltafe tcalute va rinafa gestara vluped nume laneckel da koe aala me di eglul. Pestel kalaf, musedon. Wori keldafa regalama va rin me nendoyed... Vukuda va rin bakar kiren tan uul kaiknir. Tite bata wikanda, konake wikande tid. Sinaf cot tir gedelaf voxen va kulduk gonempal. Pizauxa ke xala ke eyelt dimlicawer nume dratcer da en fu nyuwer. Bexe til djastaf is wergus. Anamdisukeson, va lani dri kosmar, i va dri pwertafi dum kramtenye. Kas ervayafa myelga rinon olegana me tir ? Kan abic madjaf is oblif vord ( va gelt obral !!), rotexaf uul zo selur azen wikande zo fenkud azen pizauxa zo titaplatickir. Bat myelgadri sotir taneafa xeka ke xantumaf ayik.

Grupeik is rawopik is ayopik flided ise dile mijed enide gruped ba tok gemeltack bak abrotcifa ayastuva, va Ayik tere ropulvit. Ayik mali xeka krulder ! Vielu tisik va kona xeka olegayar aze kotviele faveyer, dum rin sure, pune vanpiyir *Homo habilis* ayik oku *Homo faber*. Ana taneafa xeka weti toloya ok baroya ok balemoya ok dace aluboya celemda, to tickir rilafe ye inon tredune. Koni dri gickini koe nuba is dralafi gu kota favera, i gu nyofara va ari raporki ok intaki ik empara va wikande ik selura va enga ik arbera va kuldooy... Kotafa ayafa raba va bati dri malfir, i va bata taneafa xeka tukiewatana is senutuna gan *Australopithecus* ayik. Treduson va bate ye, *Australopithecus* ayik va enekef djobal ixam egayar.

Tegis tulk vamoe Serengeti azeka koe ronefa Afrika tigid. Taneaf *Homo habilis* ayik va nokol laited aze kan raporki aytad, i va sebadadunolam lumaf dum bilotol. Vrek is kirka kum gama va yasa ixam bravad ise nendad.







*Homo habilis* ayik ontinaf gu 1.40 m-, va rilafi dri tid pwertarsafi is gamiarsafi gu nubara is medrikafi gu gira dile flecur. Kevkabuson va dripi gu pistaf sid, va ini arber nume va yoni ki dem gabesa stona malseotar.



Dri sotir tamefa xeka mu *Australopithecus* ayik azu *Homo habilis*. Va kotcoba zanudar : ta rojura ik tcabanera, is ta arbera va wageye kayestane moe piluda. Oc va wageyeda ulid. Krimta va rob ke siday isu bira firvir.

Ayik is sulem sotid vuwaf : va mil kayestaks blidad. Batlize lan *Homo habilis* ayik va rozokoltum gu bilke lyumar. Malplatitison, inaf dositik kev jidol va dri kabud. Xeka vanpir kabuxa.



*Deinotherium* veyfuzol kimon ice meila is aala su awalker. Atela tori konaka safta tir ! Walzeyenon gan turci anametalasi vamoe awalkoda, *Homo habilis* ayik su artlanid. Va sulem kan roidasiyini dri basalmad.

India welfa va sutkaf kuldoy moe piluda divgir. Ton ware loribiegaf yal, to bat granaf odayol xeyeyes tir. Celkatason, *Australopithecus* ayik va kuld dem remgabesa doma faved. Sin tid tana taneafa xeka !







## Kaba kum inta is brind kum frukti

Mal dri nokodayani kev raporka num roidayas, kal gaba disa va dovoraf is gotuyun tazuk, yona vuntda al tiskid. Bata lugavafa viuca ke ckanefa abduxa zo rodiver. *Australopithecus* ayik azu *Homo habilis* azu *Homo erectus* ( *Pithecantropus* is *Sinanthropus* is *Mauer* ayik... ) abicote tid tcastapaf koe tamava. Riaf tum dem abic olkik tid bumaf arte divatcepe. Blira tir wupesa is trelafa. Ckanefa djasta ta lokiewafa tcabanera is deksaca ta divgaberanya va fruktiki medrikon zo remzilid. Kas ayik grupulvir enide lokiewon grugoler ise ropebur ? Dikeke ta tavera pu milkatcik ok «jotik». Batdume durefa az girefa gandura nope meamuzera dun tid adrafa. Vayara va bat lekeugal nover da va zolouca ke avot num inafa tavera lokiewon vangrupet. Tukeon, ayik tatcer da mal nede dun goginuyur.

Weti celemda, bata rindera va lani fruktiki ta nyofaranya ixam tir welkafi neki ke enekafa motaelara ke ayik. *Homo erectus* ayik va bata elega al nazar aze fuxetolon al nokodar, lumon ice intafa nubama ( intafe rane anton tir vas 1.50 m- ). Tokinde va bati ki fu divgaber enide va olegana gabexa is rokonubana ekwa di mal-seotar ?

Enide divgabena elega di vanpir tulon soyorekorafa gabacka, pune konaka vuntda gotitid. Tere, arti yon adref greelt ( yoltayan gu *Olduvai* sare azu *Abbeville* azu *Clacton* azu *Acheul* azk- ) gan abdiizvopik, ayik va kotunafa gaba malseotar, i va azekafa is glabafa gaba dem gemaf ilbodeks : soyorekoraca keskotafa is gaelmumimafa. *Homo erectus* ayik va bata trumafa divgabera puvegur. Yambudik vanpir yambik.

Muva va ecor ke Olduvai koe ronefa Afrika wan konipir. Troskol va int ulidinad. *Homo erectus* ayik gruped kane va sin ka-trasitid. Uleon va ugota kayestad. Toloy va gamiafi dri celkad... ( *Nakila ke toloyu bu va Homo erectus atoed.* )





Fruktifa elega toz zo tazukar. Kan yon oblif is adref vord, lana gabexa toz awir. Elegu fu vanpir soyorekorafa gaba yoltkirafa gu brind tis « tamefa » xeka dakisa va nuba is rodetazesa ik roselusa ik rotabovesa...



Myelgapa kum rapor va gijaf is suyaf ilbodeks daskir. Kan drim kum inta, yambudik va pinaf is azekaf ilbodeks volson malseotar. Va brind tuvertar, va poaf tazuk daskir. Jotik kaldisuked... nume raved.



Weda va ayik is sulem vanimpar. Moukolap banliz sielon ulidinad. Ayik gruped nume pitcad. Kan teyayana gama is kizoyura is abrotcafa kaba dratcesa, va bat granaf govitol kovudar numaze van weda platir.



Gamiat govitol adre kodiblawer. Ton tanoya empayana inia, troskol kotit drem vion flaydur. *Homo erectus* ayik vanlanid, va kaba kougaf liz rotaskid, ko fenkuyuna gariza, ko ita, ko eliwa...

Troskol mo sid su zo impar. Basalmara zo tozur. Kan mantafa fruktifa roida, tcabanesik va bat sulemap basalmad. Va mantafi cotki malgabed. Talteon lantan va almaki iliksantud. Atela mo luwin tey solzawer. Remi abrotcifa safta, greelt va intafo « cotxo » rosaveter. Kaba kum inta is brind kum frukti va kogestusa enja ilfir.







## Tey ke kelt

Raymond Dart bak 1924 va taneaf *Australopithecus* ayik koe raporxo ke Taung koe refa Botswana ke Geefa Afrika kosmayar. Bak 1947 va konaki warzafi yupki koe Makapansgat koe Transvaal gola kayestar. Bat yupolk tiyid otson tuebeltayan. Kas tiyid niska tcalayana gan tey ? Gan tey weti tol-celemda ok bar-celemda ! Kas bat *Australopithecus* ayik gu ambik co zo roorigiyir ? Ovopon : ayik = tey ise volon. Adim tere me. Niska gan valo ke azil zo tuebeltayad. Tire levrotira va tey kaikion dilizeyer, weti mon alub-vuntda ( sedme ref sok ke minafa grupera isu kosmara ). Kosmara va tey azu malsavera isu videra azu kevseotara tid jontik greelt wavdon rosoltrakun. Delafi rawopafi vargi wan tid riapafi.

Vamoion dene *Neandertal* ayik, va teyak dem derackafe raporafe anambe is guboy bene niskaki gedeyayani gan tey is anteyayani fruktiki trasit.

Taneaf tey va tuwava somalstir. Mayesis tey govanlanin enide zo rofelir. Warzera va tey di tir pelkaf kosmaks. A tey, europafa ruga ke yon oprugal me co zo frofayar.

Batugale, losavsaf grupen teyak tid guazaf vas 500 000 tanda, koe Vertesszolos koe Magyara. Tid ke *Homo erectus* ayik ( tanoy takom vanmieae senuyuni dri zo trasiyir ).

Xefto va meila koafiar. Werdap lokalion dam granafa galketa burme-wed. Putcol is uzekol is kustrol otced. Voxis ayik kuncasin gan dagafa vultera. Abicedje undeteson is lasunaruson vukid. En tid ayik. ( *Nakila ke toloyu bu va Homo erectus atoed.* )





Teyka su remostid aze grunkaweyed. Koe apkayana meila, ayikya is rumeik va awalkoda ke pustayan putcol koe anteyayan werd kosmad. Cotki drikon a gabesi dri zo iliksantud. Sulem va warzafa minta dir. Baroy *Homo erectus* ayik va gama luxeon konarid, i va gama lize beneon teyka wan vulted. Bat pestalen idul is « awalt » gin arte ma tid divulaf, i awalt zekawes is vumbes az vilas va gama...

Yazidaf soist va Sandiman tculk isu Arusha isu Kilimanjaro divnipid, is va kotar runkaf tculk ke tamava. Kottan otcer. Lanviele ayik va gama kev bat teybost koafiayar. Va kimi dubier. Tey me tir kevelik vols delvejansaf dikanik.

Aalafa meila sumeon anteyawer, firdeyena gan gleba. Ayik va anamkafa kirka bulud aze va venta vanticlanid, dizveson va disukexa. Taneakaf ayik sotir rilitaf. Grupera is opa kan rilituca zo tozud.



« Idulafa » gama ke awalt va agafa gama zilina ton sinka vumbed. Ayik va zae is cot ke wivga malestur. Gama gan teyka dere zo estud. Meila al tenanteyawer voxen « tey » wan blir.







## Levrotira va tey


« Kiewafi seri » tid, i tulon *Tichorinus* beicekol ordaf gu fentafa lidawicka. « Rotafi seri » luxeon tir ordafi gu mecoba : koe idulxo lidam fentxo blir, koe azeka lidam meftava, koe meila lidam aala. Diepilet, teli lorotafi seri enwe tir ayik. Voxen ayafa katca va ara kira sodir, i va kira lozolonapafa : va po ke tuwava grufelir ise mu int tukwar. Satcon tey tiyir, weti 500 000 tanda. Taneon tir govitaf is nekiyis mal gleba ik yazidafa traspuxa, adre gan ayik zo vider ise zo stujer. Tokinde ayikya vanpir susik ? Kas tana va bati idulafi is koafisi awaltki gorubar ise gogublisar ? Tey tir po ta burmera va atela is treduyune zae. Voxen drume bata teyka kabelcasa va stabu, ayik raver ise rabater ise dizver... Teyka va bati gamaki ton akricu dum rapor al tuolgar. Teyka ke ironokaf fird va sulemeem don telyon locrakef al kovudar.

Jontikedje tiys bulaf is eaftaf remi yona decitda, tey va radeya az maya az opelafa vuda nekiyir. Moni teveafa ik alubeafa kunda, tey tuyastawer ise zo grinuyar aze oleganon rotir zo giwarzer, nume ta kumaskira va ayik banvielu zo malsaver. Vanpir pelaca is dace rojuxa ke tcabanesik.

Pilkomodayat da *Neandertal* ayik va ayackaf adaleem sodiyir. In va awalkik gikotawayar. Va taneafa miga reduyur. Va seltafa voda pu ebava kristeyer.

Poke teyak is solzaks bene fokev tis kwafa malsavera va tey, bat guazaf yambudik ( *Homo erectus* ayik ) klaaf gu bar-sanda ok balem-sanda, va akricuotsa ok kabotsa kev reliez tuolgar, i va otsa nyofayana kan fruktifi abovesiki.





Vanawalt ok nom ? Teniskafi dili mo abica anamkafa kirka ke *Homo erectus* ayik divlizer. Susik va teyakeem aname kenibesa wida kiewagir.



Kabdue kiria dem arula, *Neandertal* ayik va tcabanerinda prilad. Geaki ke avot va mogolera nover. Abrotcafa kaba tid gadiafa. Tilerda zo koteyar isen buresik kan gelt va ota dem rupol patar.

Blira ba miel ke meila me nonuwer. Sulem va ujiwa ok kuksa ulitison kallanid. Digdatol mwarned. Krapoldunol tcabaned, anjeson va loras werdap. Tilerda gan *Homo erectus* zo ploted nume va snavol otcesid.

Tuke tukwayan tey, *Neandertal* ayik remi olgapafa lidawicka ke ironokaf oprugal roderembliyr ugale ruga is taiga aala xultuyud. Tey arte wexukirafa tilerda zo gestar nume va aneyara va brava ko tapedafa arula nover. Dile ayik va elicik kakever ! Va bata rupolya is jotaf oceem, tulon. Ina gan tilerda zo tuwiiskar aze gan intafu akricu tuolgayanu kan tey zo remrur nume ten zertur. Tcabanestik gan inafa gijarotifa inia me zo rotuzad, lyumara tire tir memiltafa.







## Rob ke tuwava

« Tokkane a beta xeka roblit ise rolaitet ? Remi yona vuntada, veyayik az ayik soe vaon lajufianded. Weti abica sanda, Mary Leakey koe Tanzania va toloya rilafa nela kum rapor trasiyina koe Laetoli nediyr. Banlize moe tculkafo guboyxo evlon gu 3500 000 tanda, va koinga ke *Australopithecus* veyayik dositasa va telyona ke putcol isu *dinotherium* veyfuzol al kosmayar. Bata nela gan nuba ke ayik me zo divgabeyed : tiyid « tuwavafa ». Bantode kas ambik ke *Homo faber* ayik va xeka men grupeyer ? Malaskison va tula ke anamedaf sulem, *Australopithecus* katcik is *Homo habilis* ayik va kotcoba rodafuna gan tuwava treduyud ise kayestayad ise vestayad...

*Dinotherium* veyfuzol kan titlivaf talgaveem joxayar ise va tawa treyer enide va zae divtawayar. Pinaf lagomyx dunol va balikeks dace tadleyer ! Warolara va govitaf ilt is tredura va kuld is aklera va yoni atelaki kev digdatol ik fliwafi zveri, belcon tiyid rob mu taneaf ayik. Bantan koe siudasa is viakusa anameda dem sulemafi is ruxafi bli ware abicote tiyid nume nope ael me awalkeyed. Kabdion rovodizveyet da tuke san-lerdoy warolas viel, lan Hottentot saneik irubas cane Kalahari letaxo decemkon rolapteyed ! Bat greltik me aelawalked. Sinafa vieleafa malestusa vertuma tir vas 2140 kaloria. Dolunenon, koe taltefa Europa, kon milgik mialukaf gu klaa is aldo va 2200 kaloria raweyackar !

Koe danmarkafa weda ke Maglemose moni -7000 AGJ-, ayik moe drimazekos blid. Kirka koe aala gu cirdatof almuk zo besad. Valey onara, kuldoy cugote zo warolad. ( Va otsa ke granafa ezba dem kuld rowit. Bata tir *kjokkenmodding* ).





Lotaneakafa kayestara tid va ilt is voja is paluk is zae. Batlize ayikya va sebadadunolam anameon vultes dizved. Bat *lagomyx* sulem va zae dere alpapad ise va balikeks ko tawaz tori cadimaj beded. Kan uulkirafi intaki, i kan krevanto tiso taneafa xeka ta nyofara va tawa, *Homo erectus* ayik va tawaz tsaxad aze va zae kabelcayane gan sebadadunol tredud.

Kayestara va tuwaf webektumap tir wemtafa, moni -5000 AGJ-. Colk leve kscent kan teca bupra zo gabed, i kan opelafa ridja kum inta dem kougayani talgakorafi fruktiki. Iliksantutuson va olk, ayikya va colk kev mebast basfayar.

Krimtaf rob tid akenaf. Voxen rawopafa wazdexa tid rifa kiren domega direkeon jontiktode ataleweyed. Bat kayestasik ke Asturias gola kene krimta ke Atlantika welfa moni -6000 AGJ- va *Patella* kuldoy kan istorafa skuma iliksantud.



Kota coyunta va aptolafa yestara sopur. Weti 3000 tanda, krimtik ke Balta bira moe piluda, va eribaki dem jemakafa tcaza ta epura va marda is flek kayestad. Gu elega kum kawodaf eip alban gan bonoltum moorted. Bata elega male Karpatos jaka tid. Meftavik kan guema katit Wisla bost vaon al rembured. Va eriba ika eip ! Moortera tir merizera va kaza rovodikadigisa va warzeks. Batlize, va tapega ika favlaca...







## Sulem iksen

Deolon lanison, *Australopithecus* vuwayik is *Homo habilis* ayik va awalkaf sulem kosmad. Batkane sinkarud, mali ruxatorafa malestusa vertuma ke aala kali tela blottorafa ke meila. Bana soe ware tir kayestara lodam ageltucafa tcabanera.

Elupkafa uzerara va tuwava is sulemafa tamava kalion nedir da lana gola tid zeitafa gu onkara va wivga. Icde sulem lidam ayik, walta rosokid : jontikviele me xonukesid voxe fereon tuyalestad. Tulon weda va dempa nekid, dum moe azekexa ke Vieja Castilla koe Torralba ik Ambrona. Fuzol ulitison lanid voxe koon flaydud. Aldo ke bat moukolap tir vas aluboy decitor ! Numen in va int me lajugrifuner. Ayik va mana tuyalestara dere ronekir ; kan kizoyu, kan tilerda is akricu, va gamiaf gulol kovudad ise van weda doimpad !

Moe kadoma ke kalkafa azekexa, sulem ticu kiria iped, volins empason va inia. Ar ko groya griawid. Koe lan dwist vamoe arula ke « *Baroy berik* » koe Ariège gola ke refa Franca, tanoy gartolap isu bedakol isu idatcol is yon bresitol is konak jotaf rupol is tanoy narmol isu manyevol ko titsuyafa arula lubed ise me royated. Batmane ikse gan ayik zo kaaneyayad nume dace zo askedayad. Iksesa tcabanera va gijafa tegisa tcabanera abdifir. Voxe va donafa sugara ixam levaykar. Laiteteson va kon sulem ok kaikion suxatason va kela isu egatason, konaktan gotid. Ede olkik tir bumaf, pune koe plabafa tamava me roremblir.

Laitera va weda artlanir. Fuzol flaydus ko drem va int me rotunuyar. Tan *Homo erectus* ayik nokieyen dere vanludevawer. Kotlizu ayikam dilfud. Tanara va po askir. Batkane va gulaf sulem fu maed.





Welimaf greccaks ke Combarelles arula ( koe Dordogne utca koe Franca ) va bata nakila rotir divrozar. *Cro-Magnon* ayik kovudad ise va bedakol onkad. Va sin van kela dem kougayanu akricu ton remay. Caesar va bate ckane kabdue Alesia malsaveter !



Kan gartolafo zarevo wetce leakom, *Neandertal* ayik va kelapa porton suxad. Tawa ke taneafe metre wan tir tapayana. Moe ludev sid tir loon bavaf numen konaku uulkorafu akricu zo rokougad. Ikse tir gadiafe !

Bate ye iksantuyune gu leltafa refema tid fixuxa. Bata kabuxa anam iniem ke okol tanameyawer nume arber.



Kela reme binca kal weda al zo rundanyar. Sulemie ba nom tauled. *Neandertal* ayik dem tilerda koe nuba iped. Mo akricu abdiegayanu gan tcabanesik, baynakiraf beicekol va int volins su kokoar.

*Niaux* arula ( koe Pirineos rodega koe Franca ) kenrone Vic-dessos ecor tigr, lente *La Vache* arula. *Madeleine* sareik moni -10000 va peya storlayana gu wexu valeve resta al kougad. Batkane va zveri gralomed.







## Pirtuca ke tcabanesik

Koe talteka wali bar-saneafa decemda isu saneafa, bedakol tir leca ke tcabanera. Va « Bedakolugal » dace dile pulvit. Inafo aldo tir vas 200 kg- nume va sutkafa atela vas 100 kg- tiskar. Yambudik ke Madeleine sare va niska is barma ta epura va ervo is xeka, is va zwart is nogla ta epura va delafa gluyaxa di malsaver.

Bedakol dene govitafa milkava dem konak decemoy olkik blid ise tid wivga fakafa gu tcabanera. Tid loote dam tcabanesik ke Madeleine sare ( uldinena ota tir vas cugon 500 000 ayik moe varafo tawavo ke refa Franca ). Bat sulem kev niskafi tugasitasiki ik kabusiko ik feyena peya ton leca ke fikuntafa tcabanera, gilton zo gretcayar oke zo balumayar solve keve dzeta ke yunkeyena arula abictode awir. Breuil gertik va brapafa pebura ziliyir : « Bedakol jontikote tiyir isen tcabanera tiyir drikafa, batdume meka tcabanesa diolaca ta vangira fiste tiyir... ».

Volson gartol gan ayik ke Madeleine sare jontik-viele zo zovdayar oke zo gretcayar ; inaf volaks vas loon bareaca ke kaatoen sulemeem paton tid, trabe loon dam okol. Tcabanesik tiyir siakraf gu po is gijarotiuca ke gartol is gu stirafe kalie ke okol. Vas 1500 kg-, gartol dere tiyir tciamaf « tamef sulem ». Valey sutkaf cot, va sum kobedeyen koe ralk vas konake sanoye decitgrame tiskar, tode moekote muvugalon zo aykar. Batcoba va balikeks tori pokef fentugal tadler.

« Ke bedakol, kotcoba tior kiewafa. » Okilik va bedakol basalmar aze va norka is barma tisa donafa ugota muber. Kabdue buta, Madeleine sareikya va veyna tugadiad. Batlize rowit kane va refema abrotcafa vas 20 m- gu almaki vas 2 m- malseotat.

( Nakileem ke batu jontolafu bu va Cro-Magnon ayik kaatoer. )





Ba miel tcabanesik va bedakol basalmad. Cotafa refema vamoe teyka solzad : atela vikizeyena jontikedje di zo rovider. Barma is niska va taksul is uul is veel di tiskad. Abica veyna pu idatcol zo kabud, grewatason gu sinafa pomara !



Sulem gu lanyeyeem zo tuvlardar. Azen jivot gu yepe zo djer. Gamion baltayanon, awalkoda ko kalifa is fentunafa ora ke soist zo levlavekar lize cadimcekon di videwer. Lan ayezok dem barma va tcalutera va vask ke wivga di nover.

Aldo ke melmakol tir vas 6 ik 10 decitor ! To inafu po nek axuca. Batlize koe weda cane fentafa *taiga* aala is rugapa poke ulidinasa kuksa, melmakol flaydur. Guazokilik ke tum gan tcabanesik su zo laiter aze ko weda zo tubumar. Ayik dadis va abrotcafa kaba arte lana tarkasa soluma kecked. Viele arti lyumara va dibla melmakol diton puskewer, pune ipeted. Idatcol va durefa durga al pezid nume vanvulted aze dere ked.



Idatcol, gire idatcol ! Jontiktode tir mekurana pelik ke ayik. Va bedakoltum koe ruga laiter. Trakiraf tcabanesik va int divvaskad aze va eliwa ke sulem tcekad, narason va bedakoloc dis va sutkaf cot.







## Brova ke onasik

Baliera va sulem ta malestura tir muka ke tcabanera is onara. Larde bedakol givulter kalion lion dam termil pujer, pune batcoba tir mila wavduca tove gralomesik. Batdume remi yona decitda, zminta is niskaduul arte ridja is frukti-uul arte ridja kum inta ok edgarda is kando dem sollipasa sulga ta tcabanera lidam onara zo faveyed. Ckane pilkovafe gu onara to bak oxam *Madeleine* sare awiyid : rontaf az livaf niskaduul tutigackayan vanpid soyaci. Iriga dem toloy uul az sulgakirafa zminta toz zo zanudad.

Radimi « darigapa » ke -10000 AGJ-, inde koe Maglenose koe Danemarka rowit, vemik ke uzda is weda va gedrapafa aalinda ta askedara va ikseda ik oblaxa ik kabayikse malsaved, i va tulon dieka. Sperela ke weda va batmanyon tralt al videcker. Don onasa dona kaikion awiyisa, ayik va varafa broza milafa gu tela batugale favena dadir... kotviele rogralomen kabay wan tir ! Tazuk me zo betayad, voldum ugota : azilfem va ksewa ke ikseda ikaplekur isen azaka va niskada ke soyaci !

Kle wit da onase ckane al zo betamad, nume wan tid yalestafe ik dace diliodafe. Batcoba tir amidapafa gu tcabanese ckane dure betane is gupoane, laninde gejafamafe !

Tcabanera dere co zavzayar diliodafa lion dam conyokonara ede abdi Izvugal warzafa wivginda me zo trasiyir, i miv ayik.

Koe Pindal ceda ( tigisa valente refa Espana kene Asturias gola ), arestafa dzeta ranyed. Tite lana zikayena arula kabdue Atlantika welfa, onasik va wayka adalafa gu medotolmilaf gepujek kan iriga kandoad.

( Nakileem ke batu jontolafu bu va Cro-Magnon ayik kaatoer. )





Moni -8000 AGJ-, bat onasik va « gatcexo » va kabay valeve pistaf ticuk al inked. Daljek zo ludzed aze gu koepak zo tuvlardad isen stoneem zo maltiolter. Seotana gabiyexa ben mebast vamoe kiewagickin tey zo rumkad. Lava mo intayeld kum tajda ok persa zo mimar, nekitison va jontik vikiz. Kabay di zo turodar nume gu nefta is beza zo nendoyer nume remi cadimcek di videwer.

Bate sardikye ke gola kene uzda koe Alp rodega va conyok rinder : walbuyuni dri va « digxa » zanudar isen feyeni almukki va « ezaxa » tadled. Soyaci kum niskada feyenen zo titickeyed : men tid dem sulguul.

Bat ayik traltiskon onad : va daljek koe soist ke Vicedessos gola kan nuba gralomed. Putcam ke daljek va epura va flek di zanudad. Katicemon koe Niaux, yambudik va daljek kev kuritca ke arula gretcayad.



Larde voa tir mantarsafa is titsuyarsafa nume me zo rotoqlar, onasik va ikseda kum ksewa batlize faved. Sina zo levlavekad, ton remak lente salt. Kabay koniyis me rodipujed.

Ikseda beetckoron inkeyena va voa oblud. Ironokafa ikseda va ikse buder : kabay drikon di zo narid. Koe lentefa azeka, wida dem anamkafa kirka blidasa va onara kene weda zo inked.







## Batinde diola vanbliyir

Tcabanesik va melmakol is gartol is okol is deaxelol keve dzeta ke ilsuyafa arula zovdayad ike lingeyed ike gretcayad. Tire lanbat tcabanesik tu yambik va katoera va batyon sulem puvegud. Voxen tore sinaf grabom don telyon rotakaf, va elimaf mukot is salafa lazava dikiyid : batcoba tiyir loon dam zovdaks ok lingeks, tiyir redura va dilint sulem, tiyir favlafa is blifa zatcara ke redusa diolura. Batinde lana miga vanblir.

Koe arulapa ke Niaux koe Pirineos rodega, tcabanesik va ribiegaf gartol skuyun gan « Feliapik » ke arula mafelad. Ve koswanon, lantan va zova narir aze kan ebeltafa conyukara kum manirtel va tanoya az toloya az baroya tceka awalkolon « bakasa » va sulem zovdar. Dositik permud. Gartol zo aytar, wivga batlize tigr, gadiafa ta tcunke. To batinde warzafa miga tir : diola va govitola zanudatas va tor al vilar.

Keve dzeta ke arula ke Rouffignac, konak melmakol zo kaatoeyed : toloy va arula kolanid, toloy ar do tanoy oc divlanid. Ban oc koe arula « kobliyir » : batcoba ware tir to diolura ! Bata miga va vuda doalied ise va lokiewafa tcabanera noved.

Kabdue balumayana krexha dem okolap koe Cap-Blanc arula, is kabdue kudjotya ke Laussel koe Beune krant ( Périgord gola koe refa Franca ), wirdama tid. Arse rogestat da prilara is dank is stute kabdue batyona krexha isu balumaks dilizeyed. Taneafa « wenya » dem diolafa is alkafa dandara, tite batyona kiria rotir vanbliyir.

Bat *Cro-Magnon* tcabanesik va eaftafe stute kabdue proyikeem ke grelt is yona ayikya isu sardik mopoyed. Kankum varka va int al mastud ise ton sulem al efud ise va kaba plotted. Bata nakila tir ageltodafa nekev abic grupeks noves va mana dimtadlera.





Abdi tcabanesa brinugapa, bat Neandertal ayik koe kuksa kotrafa gu varka moi xeftocek va int kolavad. Va dibla aboved aze va alto guon storlad : nariyison va uka ke tawa, va wivga lodrikon kle di rovanlanid. Sulem va bat abigaf tisik wupesis nek tolinion lanis toz rodaxad ! Arti balem-kunda, kevlubesikiusikaf sayakik va mastus kramolkoraf vageem vanikatcutud : vanlanitison nek mewitinon dere int zanudad ; lan nelkotap ta tcabanera is doaliera !

Koe arula ke Toirano ( koe Liguria koe refa Italia ), *Neandertal* ayik plotes va tilerda va bat divulaf pistok su kosmad. In vas kon sulem preyutas koe izga vektackar. Gu kuritcafu fixu abovenu sol sid zo aorar. Kuritca ben pistok wan kruwer...



Gabotese ckane tir savsafe ! Kan skotcesa afida ke sumgum, bat *Madeleine* sareik va nuba kev pistok ke arula aykar. Va ling kum kerafa varka putcegar aze va nuba malplekur. To akoy-dara ! Ling bene dzeta zavzagir !



*Neandertal* guazaf ayik su awalker. Tiyyir oxam balem-sandaf ! Kan zarevo ke gartol ton leakom, dositik va in do intaf imizxeem kotawad : batkane in koe kaikifa tamava wan rotcabaneter. Azon va nابخا gu raporkipi besad. Digdatol me rovodurgatad.







## Selasik is tcobasik

Selaropafa ik tcobasa tegira tid abdipifa gu kotavera ke gadikye ke selaropa, i ke Ippokrates ellasaf sposaf selaropik ( V-eafa - IV-eafa decemda AGJ- )! Mali Aurignac sare, moni -30000 AGJ-, ayik va kurkefa pilkoda ke kuritca is varka nugrupeyer. Tire, kuritca vas blixama is vebdi dogiskir, i vas rulda tikisa va kiazasi ik onugesisa roti num malsavepena. Kolavara koe dibla tid lana teca remblisaca. Kuritca va alto sovider ise va zaxara lyumar ; dzeta ke naboxa gu varka ( ruldasa vas kuritca ) zo storlayad, kiren batcoba ta nendoyera va awalkoda ke awalkik lodam malaskira va forteymiga ( vaska jontiktode tir kerafa ) rotiyir. Nuba buxayana gan tapera az rubia- yana kev dzeta ke arula ke Gargas ( koe refa Franca ), ta kiazara is fraskera gu varka zo storlayad. Tod kevplekura va nuba mo pist, gatcera tir lodrikafa...

Oriafera mali bareafa decitda AGJ- zo skur ise jontiktode tcedeyer. Lana oria batugale videna koe Cluj ( Romania ) taneatomon zo oriafeyer, ta ape fraskera va kona oriawolga. Warzafa niskafa laumara nuvutar da akolik di mobliyir. Voxazen igjult gin nutiyir numen toleafa oriafera poke tela taneafa zo skuyur. Numazen vedulesik gire mobliyir ! Mane deksafe tcobase ckane ! Mana bliuca ke akolik ! Kas me roguzekat da lana swavakola va oriafera co plataeyed ? Fenkuson va oriak, tcobasik rotir trakuyur da batkane va yatera ke swavaja jupayar...

Tcabanetik ke Gargas va nubeem vimon buxayan sotced. Jontiki wegri nope eafaf tapeks al lubed. Vandilitison va kranavera is tukuvatason va onugera, « diolik » va nubeem gu varka bumber.





Kabdue arula koe taltefa gola ke refa Jazaira, diolik kan fruktifi luzikasiki is poldesiki va ticesebadeem ke vedulesik kojoar. Va neki ke bata miga megrupet ! Rotir ta brostara ?



Oriafera tir gorestafa tcobara ise tici Gelkef Raporugal gilton zo sopur. Tcobasik va kranavuta kan luzikasiki kimar. Va oria dilfur aze va anamkuri dum teli bene skunderi solimpar. Akolesik di moblir isen eepta di onuger.



Caxa ke okilik koe Sungur koe refa Moskva vema. Kela suxayana koe buxa ke Klyazma kuksa gu kerafa varka zo storlar : batcoba tir nendasa miga kiren kuritca sovider... Awalkik tiskis va kuldoayafa ingaxa do intaf imizxeem zo kotawar.

Kan fruktifa xeka tukerayana kan tey dem nubelt kum wocolbarma, fiptasik va « te » mo oria ke yikya suyon rubiar. Ticak ke taka fu zo tcalar, voxen me grupet tokenide : kas to fraskera va kranav ok kotavesa ok ziliyasa sugda ? Oria tcalayana gu bate bulafe te cugote tid ayikyafa ise koe ckant tigis valenttalte Paris is aalafa azekexa koe Seine krant isu Oise zo trasiyid







## Gandura va veel

Moni -16000 AGJ- fwekikiraf veel awir. Vugtode man lipinotaf ganduks va manyona danexapa kiyir !

Tire veel va vieleafa tira di romplekuyur ise va kruldera di artowarotayar ise va ganduks di jonkayar. Banveli vage tanion dualtanon zo diskiyir. Vas almaxa opelon plekuyuna moe epiteem niteyer. Banvielu tir asadayane. Almaxa zo belced enide va tazuk ke alto malaskickid. Apay is djim banugale zo gruped inde lan gretcaks koe Gabillou arula ( koe Gironde utca ke Franca ) neder, laninde tison taneafa cavafa vola !

Belceson va konaka almaxa, bat ayik va leltafa vorpa dere askedad. Isen kotviele tuidulapayani raporki ko vorpa kotrafa gu lava zo mimar, pune lava toz lembiewer. Man kosmaks ta taneafa « burmo-tara »!


Voxisen koncoba loon zolonafa, vorpa noved da lava bal lanirapa ik koyara ik lamara jontikote zo rovo-divburer. Ostik, tukotrayanon gu gael, kadad kup tudrikas va pujerapa.

Radist vey vorpa zo gandur, i radist tadleyen gu dre kum inta ik abrotcafa niska ( kiren inta jontiktode tir rifa ) lize keveon asadayana almaxa zo atced. Onatason ik ilon totatason, ayik battode rolapir. *Inuit* saneik ware tis sagaf gu radist va koyarafa eksa ko leltafa vorpa bene tota aykad. Batkane bloteem zo nendackar ise mebelxar.

Batugale, azakaf veel va bat guazapaf ganduks dunud : ugot mea tir mil voxen xeka dun tir mila.

Tite kiria ke Solutré ( koe refa Franca ) bate tcabanesikye va balieyen okol van pemaxo impadimad. Ayikya ta epura va asadayane vage, va almaxa di nyofad ise di tutiguad. Va gemafa leltafa refema is veyna is zwart tuplaxayan kan art faved.





Tokkane is tokinde va veel goniat ? Elega kum taneuga ( tulon kona niskapa ke jaftoldunol ) tir vrebafa. Bata elega kan gaba ok luzikasiki gu rontafa umicapa taneon zo kogaber. Kan gabotsa, imizinda kum niskada zo iliksantud. Ton gemapaf uul arteon zo tutigad solve ekwa gu tolfeykoraf trek ( fweki ) zo fer : grupay va abduak az radimak fer isen toloy feks govadjed. Tenutcera kan nirara kev yootki zo seotar.



Fera vrebafa gu askedara va veel, va redura va jontika ingasa muka dere nover. Sulemafa talga is kuldoy is niskaki vanpid skunderi. Myast ke balieyen rupol en tir djazany ke tcabanesik !



Barnugek va leltafa vorpa kum konaka asayana almaza giskir. Bata ayikya va idulapafi dri azu ari ko lava mimar. Batkane va donafe aabre kum kladayana niska ke bedakol lembier.

Ben cewa kum inta ok megolafa niska, bat onatcabanesik va anamplekuxapa kum asadayana almaza licekad. Batkane yasa va bagafa tota novesa va grocelafa onara di dadir. Koe Cornwall gola ke Britana is Aran ewaleem ke Eirea, onasik va manyona totinda (« curragh ») wan faved. Voxen jaftolafa asadayana almaza gan wixastama batugale zo ikaplekuyud ! Abduxoa dun tir !







## Arula is brava

Brava tir adraca ! Kotugale ayik kev plabafa tuwava va int gonendayar, is kev idulars is fentap is tizaf bwaf xeftocok, ok kev yotafa rubixa koe welfafo krimtaxo, is kev moekote suka tunoapasa va fent. Koe Olduvai koe refa Tanzania, joxara va ivamu dem raporkipi tadlesi va levak ke taneafo wico evlon gu tanoya celemda al grifuned.

Arula tir lokeskotafa tuwavafa brava kire gu suka nendoyer ise va taniafa yanka ravalдар : yanka vas san-toloya is san-aluboya eka. Kle bak anzapas idulcek feda dur isen bak fentodcek zakod dur. Voxen arula zavzar riafe gelbe, anton nobafe koe kalkaxo lize solelason va pist, lava va tuwavafa arula suxayar.

Fentugal vanfir. Fentunafa suka va *taiga* aala suker. Ayikya va abrotcaf rontagentimaf kelor suxad. Ayikye gu drim ke cirdata celkayan kan tey, az tawa va in besad.

Ayafa dikiuca va arula kan vrek is raporafa feja tukiewar . Va « *tcafa arula* » dere redur, i va wico is kirka. Lana mona al zo kosuxedad nume gu suka lokiewon zo nendad ise va zijnuca ke tawa belundad. Tulon to abrotcafe kotawayane intaxe ke tcabanesik ke Ukraina ok Sibira dum tele koe Timonovka.

Voxen tcabanesik va wico dile gobulud : tulon pokolanira ke bedakoltum va ilafa brinuga tuyer. Broca kum almaxa titickana bene vemiz dem kevplekuna viza wetce abdarafa brava bam zo vanmadad. Vaxede ayik va warzafa buta kosmad ! Bak ironokaf decemdatum koe Vézère krant koe Franca, mona anton tiyid acku ! Bata inafa miala vane krant zo kolnayar ; voxen bana valeve pist tigiyr.





*Australopithecus* katcik tcabaned. Xefto koe glupafa meila dem bumaf aaltum daktewer. Ayikya va brava nendatasa va rumeikeem ampuson vegedud. Abic drimap gu sid zo kougad. Isteon ayikya va toakirafa gama anam ayezok gamdar nume va kevsukaf vrek tazukar. Kadimeon omafo wico dem remak drume sid su zo tenuker. Kaikipon lan *Bushmen* grelt bal tcabanesa brinuga va mana nuxafa brava kolnatad.

Wivgama is flavodapa ! Moe krimpa ke Boron mefta vamoe Nice koe refa Franca, bat *Pithecanthropus* katcik van intafa vreda lanir, i van buta. Tec vrek kum aaldrim, buyayan gu raporki is besayan gu gama, abduon al vanmadar.

Nekev tigira lente ticawaltara, bata dambafa buta gu suka nendansar. *Cro-Magnon* ayik va ervo abicedje isked ise va konendasa rebava kankum elega kikaweyesa ticu kiria vanmadad.



Noldot zivotcon dur. Remi konak aksat nolda va azeka besar. Idatcoltun evied ise va sumefa *taiga* aala divlanid. Tcabanesik ke *Madeleine* sare va idulafa is luvedafa luva kolanid.

Tildera ke tcabanesik ! Koe eriltwico, ayikya va tey kiewagid ise va sumgum gestud. Kan vafi luzikasiki kum frukti, yambaf tcabanesik va melmakolafi wulaki balumar : va kon sulem fu nekir.







## Ageltucafa mona

Inta is kuritca : donafa ugota ta vegedura va tawadayafa mona ke Gelkef Raporugal. Tid fakafa gu malsavera ise aultoved isen gu fent is idul is abda sostackad. Neken koe lanyono kalkaxo, ant rapor zo faver !

Aala ke mediterraneafa gola nope firdera nekina gan gleba ok kuranon vanteyana gan namulolsusik kalion zertud, i gan susik rotiskas va jotafa anga pu bonoltum. Uvoy is granta, i ligundeyen kor ke savsafa aala, va ronyofana inta adrafa gu vegedura va renta mea tiskad. Kene krimta ke Atlantika welfa, taltufa suka tid tizafa is felisa nume va atrira ke aala tatced. Batdume ant rapor zavzar rodadin ta kolnara va « rapordafa » mona.

Numazen vegeduse ckane ton zemosek di vanblir. Kalke tir kalvekackafe ; tire inafe tadle va volvaf xidaf badatum dir numen ine ton derafa pozlama tuwavon stogoyewer. Yambudik va sina tantanon moezbar, ton deraf zemosek. Tukupatason va divtraspura ke muva, kota pozla divamon zo vodjur.

Malaskison va bate ckane, *capitelle* raporda ke mediterraneafa tamava isu *borie* isu *trulli* koe Puglia ke Italia is « *bee hive hut* » blatakkorafa raporda ke eireafa krimta. Bata wicoinda tid ranton milbavafa voxen ugota zo rodimnarid ; numen warzafo wico va kono darefo atitsuyuno kalion ikarundar. Telo losavsafa grupeno tid evlon gu IV-eafa decitda AGJ-.

Wico ke tcabanesik va melmakol ke Ukraina roneon zo kolnayar. Oria is woyail is zarevo ke melmakol ta titek zo krepkad. Talgaveem va vemiz taded. Talteon ayikya va anamplekusa almaxa abover.





Ta vegedura va bat mona koe Morava gola koe refa Ceska, tawadayik va gerot giskis va rebava kum gama gamdayana is uskuyuna gu kuritca kougat. Ixam to zemosekaf ckane ordaf gu kuritcfa gola me ruldasa vas rapor !

To gedelaf gemelt : bate ayikye va galzajolok ke rapordafo wico rundad. Rebava kum kalkafa pozla « zemosekon » deraykayana su zo vanmadad. Fonsa kum inta pomasa va vegedura azon zo deswatad.



Bata wida dem « capitle » raporda zo tenuker. Yambudik kan abrotcaci madasiki kum inta, va kalkafu tilmumu maltiolter ise levmadar. Namulolafa almaxa moe vimava turodawed, kiren to susikafa wida tir.



Moe opafa furida wale toloya kuksa, wida koe aalaf tawaday zo kolnayar, dem ivamukorafo wico kum drim. Debak tir donaf : taya pokeon tigid, vegungafo aalxo va wivga tiskar isen onara tir rotisa.

Mek aal koe Orkney tursia tir, i koe bata tursia lente Skota. Onas vartesik ke Skara Brae moni -1500 AGJ-, nendatason gu suka, va rapordafo wico gu tawa kosuxedad. Kotcoba tir kum rapor : ilava is tinida is ponyaska is teyxo ikz-.







## Yambudik ke arula

Tcabanesik va gartol va yona conyeta kev kuritca ke pistafa dzeta ke arula kan gelt conyukar milinde mo tawa ok nolda jontikedje al askir. Laizon tcabanesik va lan ralk ik lan kurd ke gartol vanmiau gojaf conyatun fokagrupe ; nume va conyeta levconyar ise va konakara loplekur : balemoya xufa conyeta va inieem volad. Gartol zo zovdar, gartol zo redur !

Anamez ke pist ik tuwavaf ralk va brucka ke lan sulem poon di rodivrozad. Lana lingena ok gretcana conyeta va tuelimara va vektasuca di zanudar ! Ar tcabanesik va bat divulaf zovdaks bam diolon wid. Isen tode va sulem kaatoeyen kadimion gralomed pune inafa ewava va gevaso is bulafo po di urlicker.

Kotugale yontan va kawarzera va mana ok mana teza grutecked oke grutejed.

Weti 20000 ok 10000 tanda, milcoba tiyir : tcabanesik ke Font-de-Gaume arula va kawarzera va gartol tulon tceder. Batdume vaon toz linger ise kev krexa gibelingir. Ba siel, tcabanesik ke grelt va menistki ke gartol isu keraya pu lantan tu « *yambik* » fu firvid.

Yambafa serna vey bata warzafa tuaptara vanblid : tela ke Lascaux isu Rouffignac isu Niaux isu Altamira ( koe Espana ) di tid targapafa !

Kobas yambiktum ! Pomasik va tilerda kum brimuka gid, ise va sumgum blotad, ise va kseva tugadiad. « *An yambik ke Rouffignac* » va krexa dem melmakol volan ton jo kev jo zovdar.

Kobas yambiktum ! Pomasik va abrotcafa tilerda kum brimuka gid ise va sumgum gestud ise va kseva egad. « *An felisik ke Rouffignac* » va krexa dem melmakol kaatoen ton jo keve jo zovdar.





Ututon zovdatason va bata *Covalanas* wocolya koe Cantabria gola ( Espana), yambik va trigay dem imtum faver. Batcoba tir ckane ordafu gu *Perigord* sare. Lana tuwafava yargada ke dzeta va sid volar.

Arte 1000 m- male runak koe arula ke Rouffignac, bat ayik va melmakol ko olgafe kalke gretcar. Va pist kan luzikasiki skumar. Breuil gertik tu vartaf abdiizvopik bak 1956 va bat gretcaks gu « melmakol dem facilafa ita » yoltayar.



Tsenteson kan nuba va pistafa dzeta ke arula plawukena gu tulwafa kuritca, tcabanesik va intafa conyuta kosmad, i va conyuta tcalayana gan gelteem. I va conyuta dum telyona ke bedakol moe nolda ! Mana destara ! Batkane taneafa conya zo rubiad.

Azeka ke Duna bost poke Wien ( Ostera ). Onasik ke *Aurignac* sare va onaks ko pemaxo vanbured. Lan pak mu yambik balumas va wulakimi titir. Va vartafa « kudjotya » ke Willendorf rotir kagrupet.



Tcabanesik va gartol ta tcabanera fuzud. Kabdue bat gartol lingeyen keve dzeta pirdayad. Okilik va ronenuba storlayana gu kuritca vamo sulem baron kevaykar. Bata baroya koinga aykayana keve pist tir digisa sugda. Kas bata zatca va tcabanera ik rotir aytara va baroy gartol zanudatar ? Taneaf sulem ape pomatason va tcabanesik zo lingeyed ike zo gretcayad. Voxen kaikke diola, yambudik vanpir yambik. Va puvigura va skuranya va gretcaks ok zovdaks satoler.







## Ruzadera va aalxopo

Bal darimapa ke -10000 AGJ-, lidawicka loeke tuzakodawer ise tuabdawer. Ruga koe Lentekapa anton lapter. Wexuaal is cirdata ke *taiga* aala va runda pu datafo toaalxo wale tev-saneafe laksiwake ( Oslo - Sankt Petersburg ) isu balem-saneafe ( Bordeaux - Beograd ) isked : naviula is persa is wetinga va glupafo aotcafo aalxo divlizeso male Ural rodega kale Atlantika welfa tadled. Ino tir kulafo gu wivgapa dum wocol is wafibol. Taneaf boniasik va inta kan tey is kufta saved, ise va taneafa senta wasarnad lize va midura toz voned. Va warzafa xeka vanikatcud, i va teca gaba dem jakteks cuf gu intanyofara, az va skuma is kufta solgabena sol fruktifa elegapa.

Boniasikafa wida fu tir dem anamkafa kirka dem feykorafa kepaita. Drimkirafa istayaxa va miduxo kev alkejara ke wafibol fu nendoyed ise va taneaf bonoltum sutud : i va bulol is sperelaxof jaftol. Vakol mali -17000 AGJ- koe sibirafa aalapa zo tukwayar aze vanpiyir tciamaf gositik ta tcabanera va wocol ik wafibol is ta pomara va suera va bonoltum is lyumara kev idatcol. Gedraf rob ke bat taneaf tawadayik ke Talteka va vanlaumara ke sanelia is gedruca ke yambudafa tegira dived. Wida loote adre vanpid. Tildeteson va tawa, warzafa senta zo wasarnad ; warzafo aalxo zo anteyad numen senta sinton tere afodad... Batkane adre miduna azekapa awid, i aaliskafa azeka dum Beauce ok Ukraina lize suka turodason dun dur.

Tey va aalxo su torsar. Bat ayik va aaldrim kan kufta cuon celkad ise tuuulad. Bat nuk ko sid zo kougad nume va dzeta ke intaxe tazukad. Lotigafi intaki va vegedura va renta ke kepaita zanudad.





Senutuson va ulidinarak ok esturak, bat aalakobasik kan stuka va drim suxar. Namulol va eip albackar ; batlize va eip tigus koe mantafa donila friner. Kot kwaf ugot kum inta zo vegeduyur.



Baroya kseayana olkotcapa kum inta va dezark tadled, i va dezark impadiman gan toloy mirembayan jaftol. Loyta tir ilbodeyeni fruktipi ludzesi va tawa is bourgasi. Batcoba tir abduxoapa kiren olk conya-koron zo rofaytawar.



Aalakobasik va ebeltackaf buloloc su gralomed. Ar bulol ixam tukwayan dis va ventuyaf gem dere tir. Sin va duele maestud. Tod gilduracka, occek ke nemon govitaf bulol titir. Sinaf pustayan cot tir gedelaf.




Jontik sulem koe toaalxo viakud. Wocol aultoved, loote dam bedakol buluyus van lenteka. Wafibol dere viakud : zo laited aze zo balied. Laitesik va buloloc kan dona gralomer. Tod direfa vartera, abdi konak aksat va wivgacka watatar.

Teyka ke tey turunkayan tite aalap vibad. Sardik va gama vanbured ise va tey kiewagid. Aal kan kuftra lodrikon zo robalieter. Kuftra tir vafa olkotca kum frukti dem gabexa lanibelcafa gu nubelt. Dum noelafa kuftra ! Kabdueon bagalaf yambudik va balieyen granaf drim suxad. Va stuka dadid, i va fruktif imiz dem gabexa gentimrontafa gu nubelt. Va tandrimafa guema suxad.







## Tukwayan dunol

Remi yona decitda, ayik va melanuca ke tcabanera levgar. Kon melmakol balieyen ok awalkeyes nope geba ok akola vanpir ageltucafo atelaxo ! Kon bedakoltum oku enekeon wocoltum va grelt remi konak viel gestud. Zavzasa atela turodanon ik vikizenon kan tey kum kusafa inta zo rovideter. Voxen balikeks adre zo pusked numen djupokosmason va warzaf govitoltum, ayik va zida fure gozemad.

Jotafa egluyusa namulolya ( sulem ke katcama tid lodrikon rogralomen ), ik kon pintaf namuloloc varteten gan ayik, is abic jaftoloc umbeyen gan tcabanesik, ik kon bakayan sulem rovanlaniyin az ropeyen, rotir tid taneaf bonol ke kwaf tum ? Kas vartena is blison videtewesa wivga to tid ? Rumeik aeled : tan bonol ke milkava zo wetar lodamen ayik tcabanetesomallanid. Moni -6000 AGJ- koe ref Châteauneuf-lès-Martigues, namulol va 40 % ke raweyana atela tiskar ; bak -III-eafa decemda baxek tir vas apu. Namulol is deaxol az jaftol ton milkavapa, va geltrafa malestusa musuca tadled. Efe tcabanera dun zo ur : govitaf jaftol is faldol is wocol is wabol is wafibol is okol ok rayol, kare gola koe tamava, wan zo laited. Dace zo tadud kotviele rodcek va kwaf bonol xonukesir. Tuwavafa zexa va warzafa vonera va tcabanera is tadura kotviele nekid. Izva va jontika tula divneditir.

Tukwara va dunol va zolonapafa blikapburedopafa danexa nekitir. Milbava ke tuwava zo joar. Tulon koe gola aname Mediterranea bira, namulol is deaxol va aala vilad. Granta tisa ligundenaf klodaf ruxeem di tazukawer ; xeftof muvacek va tawa impadimad numaze kalkafa pozla zo rowid. « Raport atrir, ~ lan tawadayik wan kalid. »

Weti tevoya decitda koe Tassili n'Ajjer fluvor, milkavapa dem jaftol dis va drorakorafa nola is kretsakiraf gem bliyid. Jaftol-susik va bonoltum kev butafa raporka linger...





Tite Saint-Loup arna katice Montpellier, bat namulolsusik ke Leke-raporugal do vakol va bonoltum suer. Inafa ladavakorafa peyapa ta ebidura is nyapera va namulolya tir leca ke inafa vartesa blira. Keve yon atcom koe granta zo balumayar.



Namulolsusik va bonol poke lujoromkorafe namulolxepe tiyad. Ayikya va bayna koe kuksama moe raporafu tilmupu tcater. Artan va bayna walo gelteem femur aze anam femak dem tawoldafa baltaxa biekar.



Opelapafa rujda. Rawopik va aldoxa anton katrasir, i va dri dem toloy big, ok va tawoldafa aldoxa atcesa va xuf rodafemeem. Yambudik va remayfem bene biek gamdason remplekur.

Bata vartesikafa is tawadayikafa wida tir Windmill Hill koe Salisbury azeka koe Engla. Tir ton anamkaf tazuk vawale suyaf kelor tiskayas va fruktipi ta epura va xeka. Afoltaf baspieks va migexa tadled lize moeon gerotxa ta sura va milkava zo kolnayar. Konak vraday va kelor waljoad ise noved da susik is bonoltum mo koridxo rolanid isen midusik moe miduno wasarnxo rokobad.







## Taneaf tawadayik

Tuke tukwara va dunol dum namulol ik jaftol, vartetik va blisa wivga drikon lizukon dadir. Tuke taneafa midura, tawadayik va olegane zae isu olk poke tuvel ke kirka dadir.

Miduse ckane tir gijapaf kosmaks ; va warzackaf swavasok levaykar, i va swavasok nekin gan yona disvera sopuyuna mali konaka decitda. Ayik va govitaf webek taneon dotayar kire al katcalayar da va jontik sinkas fayam sowarzed ; dere raveyer da bat seluyun fay va regelta ta askedara va kurfa is dibuk tiskad. Voxen abdion, obrason rindeyer ise undeyer ise vangrupeyer da bat fay taplekun ko tawa bak imwugal va gemaf kusaf werdolk is pinapafa imwa di warzeyed, i va imwa adeesa titi idulugal eke sina va warzaf olk silukon di nazbayad.

Ayik ape vofayar da fay va lo bar-sanoy taelcek sodiner abdida va warzaf nazbar ! Bat abrotcif kes nek pokoles ugal zavzar ana warzaca ke tawadayafa artowara. Warzaf lum gu baroy ar va int loplekur, i lum ke ugal gu darka is soluma kal aalxo ok kuksa is aludeve ke sid donaris vas zae is frukti.

Kirka vanpir vesk. Poke tayeem goneninten is gonendan kev vilasa talga ke namulol ik alkejara ke wafibol zo vegedur. Kalsulara va rata belkesisa va anganya ixam tir midusa kobara. Vebaltara is faytawara va belcafa kobara dined ; vesk ton wida va sint lospad.

Kan taplekusiki, tawadayikya va fay ko tawa plekur. Sumeon baroye ayikye va sid tumiltad, impadimason va gamiaf kseaks kum inta kaikvajayan gu gamatum. Talteon yikya va kuritca zanudatasa va iara va trig rutuler.





Kan anamkafi dri krafolmani koe kuritcaki, bata tawoldasikya va trig tezodar ise va dzeta tutiguar. Taneaf trig tid pozkoraf kire va recia kum alma ke tcabanesik lakawarzed. Asadaks grupayenon zo milaskid.



Trig leve awalt zo turodad voxnume tid rantaf. Urlicketeson va lanafa acagisuca, koe intatey zo goburned. Goatenon gu gamaf ilavot, xelkanon zo ezbad. Gu tawa zo besad azen tey zo turunkar. Jontik trig di empaweted.




Bat vebaltasik kan bupra valem kscent gaber ; bata ladavakorafa olkotca kum inta tir dem fruktiki dum talgeem ke prijust ke namulol. Koe savsafa misrava, « mâ » vas prijust voxis bupra belcon sugdalar ! Namulol va korid moi vebaltara di muled.

Lan krant ke Hoggar gola dem arestafa kiria weti anyustoya decitda ! Muvara va bli ke govitaf dunol dum fuzol is beicekol is troskol turotisayar ise va rionda tukotrayar. Tawadayik va zaipa miduyud : taneaf miduyun olk mali -6100 AGJ- zo gruped. Kabdue intafa leltafa broca, warzeteson va regelta, ayikya va olk moe gatcewa selur. Rumeik lente sukara ilnisa va bapla, va olk kan iriga kum inta katacer. Batugale bata gola tir re letaxo...



Ta basfayara va dent, basfayasikipi moe basfayaxo zo impadimad, i azebap udanaf gu fruktif kotcatum ; kotca va bewot sollipad numaze va olk tunuyad. Batlize yambudik va basfayasiki dimempar : va fruktiki kan bweda titplatir.







## Guemik mo bira


Tison yastaf gu tuwava is tiskison va olgafa is tegisa blira, ayik ke abdiizvugal wavepon ape grupujeyer. Kore dum batugale va mane kalie ik martig ape me rowokayar, pune inafa ekesuca ape tiyir gijafa. Rotrakut da *Pithecanthropus* ayik isu *Neandertal* va konak vedil dum tel ke Gibraltar isu Messina rovorem-lapiyid. Tulon kan aaldrim va int senyeson rovopomayad. Mal Tarifa vagearte Espana, afrikafa krimta monepon tigrir. Opelon pujeson, Gibraltar vedil me tir meroremigan vakor.

Dadison va veel noves va sardura va zwart rem almaza, *Madeleine* sareik va tukiewana muka epur. Leltafa vorpa va plawa vided nume va ayik gu durefa lavayega tunuyad, isen milafa vorpa deeyena gu gael ezad ise va kup rovoyordad. Batugale rumeik va adeepeyen kup kum loy ok kloya riwe milinde zanudad viele grurapujed. Weda dum siday vanpir tcabanexo. Valente Europa, tcabaneonasik va totuk kum almaza asadayana az atceyena ben vemiz wavepon gandur. Bak 1977 Timothy Severin va Atlantika welfa kan mana leltafa witka remlapiyir !

Aalatcabanesik is tawadayik va jontika yorda don nyofara va inta isu celkara ksubed : kalion katcalayad da aaldrim sokezar. Suxason va drim, va tandrimafa guema kosmad. Onasik ke krimta ke Mediterranea bira va drim pwertackaf gu iara va guemapa me dadiyir ; ikaon va granafa stava kum edgarda zanudar, tantanon popon gluyason.

Soktara mo arestafa Vingen ewalama ( Norga). Gretcason va zovdaks va totuk kev pist, guemik va conyuta icde jonvielera isked. Tcabanesik va cpogol va xo weti toloya ok baroya decitda lekeon ixam worayad.





Lapison moe toloya abrotcafa tandrimafa guema, onasik va anamplekusa donapa impadimad. Radimi tuvlardara az turodara moe mebast, kabay koe drimafo wico moe azekosap drume uzda zo videted ; bata widama tir dem gafowa. Bak -IV-eafa is -III-eafa decemda, domega ke loa uzda ke Alp rodega tid dem jontikafa sanelia. Va rob ke onara isu tcabanera isu domegafa midura isu vartera is rob ke vemafa aala beded.

Bat onasik senyes moe aaldrim va kuksa katitlapir. Dem tra is kotraf tcekak, poka Balta bira va wayka kaaneyar. To -VIII-eafa decemda tir, poka weda ke Maglemose.

Moe piluda ke Aran ewaleem ok koe Galway ceda ( Eirea ), onasik va riafi intaki ezason artlaniyisi tredud. Aal koe bana coyunta me tid ! Va vemiz ke totukap besatan gu jaftolafa almaxa vevedud.



Ayikya va kiewafa edgarda jontikote vestad, i va abrotcafa is vafa edgarda. Ayikye ta kopaaslera va kon drim sorlad oke ta epura va totuk belced, i va totuk dem kamanapaf otseem. Man edgardaf tiv koe Sardegna ewala is kene Nil bost is Tcada uzda ware krulded, voxis kene Titicaca uzda ontinafa vas loon 4000 m- koe Andes rodega. Bak 1947 Thor Heyerdahl totasik va pakava ke Pacifika welfa kan edgardaf totuk remlapiyir !







## Kawaxo dem frukti

Kawodik va bareaf lum felir : i va aludeve. Vartesik ke Mediterranea biragola isu midusik ke Duna bostxo va abicote frukti faved kiren kuksafi dri ta epura va kufta is stuka umote tid.

Volson aalkobasik va jontiki frukti ta gabexa ke kufta is genva iana kum bat ugot raweyad. Olgafa intanyofara va pwertafa xeka maldiner. Batdume kayestara va fruktiki kou sidwelma mea staper. Numen ayik va kela kal suyafa fruktifa bada vanmiaa afoltafa bada toz suxar. Koe Spiennes koe Hainaut gola, ilsuyafa lupaxa datcon ice krant taneon zo fenkud lize fruktifa bada makewed. Voxe kotviele tid titsuyarsafa, pune wupesid ; batdume kawodik va lird mal azekexa kal fruktifa bada toz titsuxad : batcoba tir kosmaracka va « drekobara »!

Dugajafi frukti zo ikudar numen « litcanya » anton zo kosaved : kawodik kal aludeve vas 15 m- ( ontine ke alubvegema lipok ) titlanid. Kotviele afolt tir olgaf, pune suxara tir kan skuma kum frukti ; arviele tir mildaf, pune kan skuma kum wocolbarma. Lanlize loa 1500 skuma koe tanoy lird zo trasiyid ! Kotviele lupaxa zo tuabrotcad slikeke toz wupesid, pune warzaf lird zo titsuxar. Koe Grime's Graves ( Engla ), mon 400 lird ton polku zo otayad. Jovlen lird gu baspieks ke kon warzaf moion zo adoner ; batkane xonukesisa kikawera zo taruted. Koe Hainaut gola, lan lird titsuxayan bak -3390 bak -3270 AGJ- zo pieyer ; acum remi 120 tanda zo saveyer !

« To donaf spert ke frukti, ~ pradjokilik pu parloesik nukalir. » Datcon ice lan krant ke Hainaut gola, fruktifa bada makewed. Kawodik va lupaxa ilsuxad.





Yasafo kawafo savexo moe azekeka ke Oise gola. Uzesison va titsuyafa bada dem frukti, toloy kawodik va lird titsuxad. Kal aludeve vas loon 15 m-, rotir. Vrek giskin gan balemoy gerot gu muva is awalt nendar.

Koe Norfolk gola ( vagerone Engla ), lird ke -III-eafa decitda isu -II-eafa tid lomantaf : xakola vas 5 m- koe Grime's Graves. Abrotcaf bil ok bigkiraf persadrim zo faved. Kon kawodik gloder, batcoba tir tanaeafa kobarawalta.



Jontik lird ke -IV-eafa decitda isu -III-eafa tid xakolaf vas 80 cm-. Kawodik altogison dum meftavutiusik titlanid ise ticlanid. Bil me tir adraf. Eruilt dem frukti kan wazdel zo ticbured.

Afianon gan puntagum, soli va omapafa lupaxa suxar. Skumasik va fruktiki griksantur edje pomasik kadimon divbulur. Bata portafa kobara koe vafa afoltafa gopa zo ksuber. Fruktigakola tisa kawodika akola ixam ernigur...



« Witafa » kawoda. Abrotcafa lupaxa intaxeyena gu drim koe meftava vanludevawed. Toley kawodik va gamiaf vaj dem eip moe ksid divbulud. Sideip vas mordarapa sareon gu Hallstatt ( taneaf azilugal moni -900 AGJ- ) mukar.







## Raporey is ckant is kepaitakiraf gaest

Mali 50 000 tanda, ayik va awalkik koe arula bravar tode gola vason ruldar. Moni -IV-eafa decemda, onamidusik koe refa Breiza is sulemsusik ke Causses gola jontikote tid ise ton gijarotif grelt va sint grustad ise va gracafa arula vegedud : to « raporeyafa » arula tid, kolnayana kum raporki vas 20 ik 40 decitor ok loon. Lantode abic opelaf swalot ( raporey ) zo kougad. Tode besasu tilmu moe toloy swalot ton uwedjela zo inked, pune ckant zo tazukar, i cugexafi tuveli bravasi va awalkik. Konaka uwedjela keveon rundayana va « kepaitakiraf gaest » tadled.

Loeke grelt tir gijarotif numen loeke okilik zo payur, isen loon ponkik va cugexa bagaliafa gu in djukolnad ( moekote viele payun okilik bak blira volmiv vegedur !). Acum ageltucafa « raporeyafa vultera » zo kabudar. Konaka woda va granafo aldo ke batyon vegeduks num maldineyena askifoara kramon rietad.

Aldo ke besasu tilmu ke ckant koe La-Ferté-Bernard isu Bagneux isu Saint-Fort-sur-le-Né isu La-Frébouchère kottanon tir vas 90 decitor isu 85 isu 70 isu 60. Aldo ke raporey ke Gozé ( Hainaut koe Belga ) dace tir vas 25 decitor.

Kepaitafu tilmu ke Saint-Fort-sur-le-Né, koe lano raporxo tigiso arte bar-sanoye decitmetre zo iliksantuyur. Lum ke raporeyap ke Locmariaquer ( Morbihan koe Franca ) arbeyen gan gleba tiyir vas 20.40 m- isen aldo vas 348 decitor. Impadimatason va in, 1750 ayik ok 250 jaftolye tiyid adrafe. Kolnatason va batyona cugexa, nivafi tari koxutackani is dirgani gan « okilik ke pradja » remi yon abrotcif aksat oku tanda ape kuncayad.

Kan zatca ik puda, okilik ke pradja va tiura dirgar : nenera va raporeyap mo tickelda ; kiazara va volsafa otsa kan yon matek ; pastara va granafi raporki ko kela ton rotisa loxufa tirka.





Tcarnapa gijafa dum venta poke bira zo kolnar. Viaf dodelikaf ezgalday va tawa is dri ton ksidcekap dagimar, kabdue vegedus blodik patackas va skuyuna kobara. Lum ke Saint-Michel tcarna koe Carnac ( Breiza ) tir abrotcaf vas 115 m- is mantaf vas 58 m- is ontinaf vas 10 m-, isen inafa vegedura va kobara ke 400 ayik remi icle tanoya tanda dineyer. Vegedutuson va naboxa ke wideyaf ok alkaf okilapik, konaka wida va intaf kobasikeem kabelcad. Numen banugale grustaksap ape krulder.

Va bata caxafa fipta koe abrotcafa kepaitakirafa lupaxa ke Mané Rethual koe Locmariaquer ( Breiza ) fakon rogestit. Mana rapor-eyafa cugexa tir naboxa mu belcon okilik is inaf yasik iku yastik : nume tir donafa.

Gamiafu tilmu kan madasiki zo levmarad. Takrelaf is oblif dositik va yaxasi raporki rundar, i raporki giskisi vwon ice lane ontine is tufakasi va arplekura. Va burgiki al narar kiren koni kalkafi raporki co zo selur.



Anambeckeyen raporey moo drimvraday zo nener. Ironokaf drim re kadimeon tigis kabduon vere zo rundad. Tilmu ke ckant ke Proleek lente Dublin ( koe Eirea ) vas 40 decitor va lo 200 ayik ta arplekura dineyer.



Swala kougayana gu sid is yaxayana kan raporki re tid rundacka-yana. Pieyena tickelda kale ontinuk zo vegedur. Ayik va besasu tilmu vamo swala kan laday impad ise kan madasiki platid. Tilmu nope aldo fu rundawer.







## Vegeduropik va ctake


Vegedusik djastas is megas va zatca va logranafa elega tazukatasa va levak ke kolnatasa cugexa taneon kabelcar ; batkane me goticburer. Azon va lopinafa is ronubana elega krepkar. Bam vanpir veveduropik ! Mali -IV-eafa decemda, vevedusik dere vanpir « rapordivgabesik »; va rapor kare veyadafe ckane celkar, i kare veyada kazawatasa va intasimba. Jontiktode tuazentara va welma ke raporki is tenutcera skuyuna kan bweda va kota conyuta ke veyada al vilad. Raporey ke Kerloas-en-Plouarzel va toloya volsafa ralka vider ; sina tid nenes istok zanudas va modemara va wazdel is nenera va elega.

Raporeyafu ivamu ke Stonehenge ( Engla ) zo vodjuyud enide awalt lyon ice cugexa ba idulugalafi volegaki ticawaltar. Koe Eirea, tcarma ke New Grange vas abrotcafa lupaxa stasa kal caxafa mawa ruldar, i kal istefa mawa zemosekon galzayana.

Ba fentugalafi volegaki, ba kot tol-saneaf viel ke santoleaksat, bata mawa gan awaltafi afi remi 17 wexa wali 8 b- 58 is 9 b- 15 zo koafir. Veveduropik dere tiyir kocopik ! New Grange va dopewa ke Ramses II koe Abu Simbel koe Misra obar, i va dopewa suxayana koe kiria is milinde vodjuyuna... arti kaikion 1200 tanda. Ara veveduropafa sega : mawa ke ckant ke Antequerra. Inaf lum tir abrotcaf vas 24 m- is mantaf vas 6.50 m- is ontinaf vas 3.30 m- ( welma vas 160 m<sup>2</sup> ). Cugexa vas 31 raporki anton ruldar ; aldo ke ludevafu tilmu nivon tir vas 320 decitor. Kotafo aldo ke cugexa tir vas 1600 decitor.

To idulugalafi volegaki koe Stonehenge koe Salisbury azeka ( Engla ) tir. Vawale cugexafu ivamu, awaltara koe lya ke logijafa barraporka ticstir. Sielon, tey zo turunkad...





Barraporka ke Stonehenge ! Swalot vas 50 decitor va istok moe moak dadid. Uwedjela tid suxafa gu veyada blonjatana ontinon ice 8 metre. Tichiso piexo ta aykara al zo senud.



Celkatason va bata pwertarsafa elega, raporilbodesik va yona vancanyana veyada kan istorafi poldesiki suxar. Ko kota, va simba kum inta kan bwedapa titplatir. Ayikyva va simbeem adeetes moion rustoler numazen pist ludzewer.

Raporek ke Barnenez-Plouezoch ( Breiza, Franca ) tir tan logijaf ke Europa. Bata raporafa flavapa gan yona rebava abrotcafa vas 85 m- is mantafa vas 35 m- is ontinafa vas 8 m- koeon zo giskir. Koak vas sanoya caxafa mawa don anyustoya kum raporki is zemosekon galzayana ruldar. Bat raporek tir evlaf gu IV-eafa decitda aze vanpiyir raporxo. Neditison va dre, yunkesik va in ligundeweyes al zovdar, i va in ba giwara.



Kabdue jontolafa resta ke Antequerra, i kabdue « logamiafa cugexa ke tamava », varaf wid va intaf okilikye is dositikya djuprokotawar. Dum misrafa naboxapa, yupxo di zo elakeyer numen meka rawopafa xa zo trasiyir.







## Ayik ke lut az iyekot az azil

Isti -III-eafa decemda, warzaf ugot koe talteka awid. Tid olgaf is elkaf nume, tulon tazukatason va kufta, medrikon zo romyelgad ; neke tre myelgara ton toaz zo tutiguad. Bat ugot tid moava is lut ise ton nazbokaf sok zo malsaved.

Ckane ke jera va batyon taneaf ugot moni -6000 / -5000 koe roneka ape zo grupeyer. Kawot gu cadeka tuidulayana kan inta zo komimad aze koe cupasiki yankon gu 1100° eka zo aynad. Voxen lutafa kufta kalion solamewer. Wori aotceson va jen lut gu ar kawot dum dig koe Anatola ok vopel koe talteka, va lodolgafa num logabesa yanta seotat. Viele ayik kosmar da vangluyaksafa pona ke iyekot tir vas sanoy pak dem lut sotre tanoy dem vopel, pune va torigiraf kosmaks tugeltrar.

Danexa tid granafa is jontikafa : taneon imizxa ( kufta is nubema ikz- ) kum yanta zo iad, i kum iyekot az mali voltaneafa decemda kum azil. Azon siluk ke xeka...

Kawot zo ikseltad ; aneyatason va vopel ko Cornwall gola ( Engla ), guemastasik va Manche bira exuled. Milugale okol zo tukwar isen krafol zo gandur aze zo galbur ; va anamuckesiko ke tawoldopik is lima ke tawadayik di rabander.

Abdiizva nope lana eroyafa tukaliawera keni yona zolonafa vilara tenekwer. Tire, aala tiyir kosapafa gu abdiizvugal, balieyena gan kufta ke vartesik is tawamidusik is yambudik.

To kono yantanyofaxo koe Anatola titi Iyekotugal ( -II-eafa decemda ). Ontinafa cadeka ( vas 2 m- ) kan inta zo tuidulad ise va rilaf kawot zo tukotrad. Aynas okilik va divtraspura ke yanta eninter.





Lut is iyekot ta iara va kufta is nubema runion zo balikeyed. Yootafi cupasiki ilbodeyeni kan raporafa sadja va xeka suxon kawarzed. Tec pezom ( gaelasa stita ) nover da tie bak aynara ro-divcadekawed.

Moi tufentara va yanta, kufta zo divcupar. Inafa gabexa kan nirara kev yootki zo tucuyar. Traspuks is sulga ke nubema mo kreyta zo myelgad aze zo tunirad. Prostewafe ckane ke rapor tenuketeson wan zo faved.



Jesik va kuritcafa vuka kotrafa gu delaplawesa yanta kan toloya viza kum inta vannarir aze va cupasiki tukotrar. Kufta wal toloy lik ke cupasiki zo aynar numaze vas abrotcaf yantaf traspuks bene zokeveks ruldar. Rucara di griawisir.

Pisusik va imizxa is iyekotxa bures va vajap zo koskayad. Voxen iyekotafa tceka va cot lodolgon dam frukti sollipad. Xango ploteno gan pisis okilik tir crakepafo loon dam raporafa kufta...



Koe Merveilles krant tite Bégo mefta, bat namulolsusik va taka ke nolakiraf jaftoldunol ke intafa milkava kev keraf fwek gretnar. Va iyekotafa nubema dere regrar aze va welma kan istoraki pulledar.





## Mali wida kali ralma

Remi baroya decemda, wali -5000 is -3000 AGJ-, sanelia ke coyunta titisa Gallia male ota vas 500 000 irubasik kale alub-celemoy towar. Sanelia ke Tawava dere jonsanawer, kale 300 decemoy irubasik. Wida zo jonkad ise loloon tuzolonawed. Grustara tuadrawer. Hautes-Bruyères furida wale Seine bost is Bièvre kuksa xanton gu Paris, vas abica anamkafa kirka is tanoye rontagentimafe intaxepe oxam ruldar, voxen Windmill Hill wida va ivamufo lizuxo vanikatcur ; anamef kelor zo suxar. Kaikion, widam ke Biskupin ewalama ( Polska ) kare mil zovdom zo vegedur ; va intyona mona vanconyar ise va ageltucafa is vafa migexa anameon vanmadar.

Jonkaweson, wida gu truminda zo broed : kelor is nuku is gijarotifa migexa, pitcas rasek is rolizina za ikz-; ostik moe furida ok kesi ok ewala kre zo kolnad. Vegeduropik vanpid gejopik : Dun Aegus folk icdeon tir akoydas.

Wida licawed, ta lokiewafa rojura, va runda leon kereled, taya is baspexo divlizewed. Tawaxo fakafo gu nyofara jontikedje zo midud. Aalxo dun illaumapad. Taya zo griuziackad isen pilkotik lickon anamsud. Savsafe sare dem wida is tawek mesolwif gu tazuk is meelimaf gu kima mea tir : banugale mekimafa darka kruldeyer nume gan kottan zo rotupilkayar ! Batugale, memusuca dun abdufir. Batdume yanta ( nelkon azil ) va iara va dug lodam dezarkloyta zanudad. To mana vamoecupa ke digisik va azilafa kaba oku dug tove tawadayik ok vartesik anton dadis va peya !

Dilfura va « crannog » Craggaunowen eireafa ralmawida ( Clare gola ) tisa folkayenafa wida ke Azilugal is kolnayana moe trumindakirafa ewalama. Ruzadesik tid lokiewon ervokiraf isu rojuxakiraf ise va Engla artulapid. Izva tir kadimifa.







Vegeaduna wida moe domega ke Neuchâtel uzda ( Swiza ). Pieteson is tudelatason va doma, edava dem kotraf krafol va tawa is ye dagimad. Azekos titis va levek ke warzafa wida, koe weda zo vegeadur. Rigotc va gamiafi raporki yezvasi va nuk numu kougasi kal acaf sid levburer. Rontagentimafa intaxa kare vun zovdom dem nudacka fu zo kolnad. Bata mona vas toloya olkoba girulad.

Begcade kseyane kum kuritca moe raporaf titek dive mona zo vegeadur. Fird tid nobaf koe uzdafa wida. Lana dimjoara skuyuna moe Konstanz uzda gan tey weti konaka tanda zo vilayar.

Aname Dun Aengus folk koe Aran ewaleem, arte zobexe ke poxara male migexa, azavzatason va ruzadesik, zuvda dem mederafi raporkipi zo inkeyer. Batcoba va waleknuktum ke romik kabdue Alesia ok witaif kevbortaf lirik larbudar.



Ewalama ke Biskupin koe Polska mali Gelkeraporugal zo kereleyer. Bak -VI-eafa decemda, wid kotunon grustan zo vegeadur. Vakenefa nuda va abrotcafa intaxapa griuziad. Bedom kevtite migexapa anamlicar. Onas tawadayik va yultava dem walekayan persaf trink tukotrayana gu tawa is tigisa tite nuku. Tite migexa, tuuulayan nuk bramon kougayan gu runta ke uzda is ruzadesik nendad.







Ba bata kanyafa ewa, zo funé. Va kontesa zijnuca wí, i va zijnuca ke battelya koton arpumasa vanpitison va fertik vox merodiepilesa va jinafa akolesafa vazuca num dostesa va jinafa komodera pokeon. Mali balemoy aksat, dun kalí da va ine rená voxe meinde kowazdé voldum gitisa getcuca ke ayikye nek jontikviele ikasa va rena. Poason artafí. Gire tí do darefa skaltera viele den Marthe fu kolaniyí. Voxen dum kera kabdue tuvel, tela kabdue rena titir trelafa. Ostik, jinafa gesta va yona dreladaca pu int abdiplekur maneke vol lajupenvar. Dere taneatomon kiva da va kurenik vektá nume va setikeraja ke cinyon renas gemelt pu Marthe fu nafé. Kle ine su tir kalafe loon dam jin. Voxen dye viele va sint kevulicav, pune inaf iteem va jinafa akolukera vodackar. Inafa gexata al remvolawer. Dace destá da va robuda aname inafa vola dum koe alkafa trutca me rotuzá.

Gu mana kivara re tí kiazayan, voxen ara artfid.

To tere gildason va gijarotiuca ke zatca men ebleyena golde vazuva, skotcé da Marthe va kurenik co pasur loeke espur.

Larde va coba taneatomon grivutena vol rogildá, pune va pojara va renara kotvielon loeke grupeté.

Keson, rolafe puve va enkranavera ke ayikye pu jin vanburer : i va lickuca.

Va Marthe saté kire nope inafa muntafa gexata va sotisa kotcoba ke cotgluyeem gildá. Va bantan rotapsá, i va bantan divmodayan va inafalto abdi jin. Va intafa fituluca krafiá, krupteyeson va Marthe gu ketik. Arugale, djumera va awalkera ke infa kurenik co tir rumeafa korcaca, voxen bata fuxa tugomilawer lewe mileke ede co aytá. Gu jinafa koblisa kaluca va geja danú ; va ontinuk guon ké. Pokolé da ina va jinafa bogera fu zanir milinde kon ayoltik ika min gomilar.

Re, belcon borev ; to golde kaluca. Marthe culimer da va dalintafa kurera me al weyoná. « Voxen artode, kas koe bata ilava inton narayana co tigí ? Dene gadikeem co irubar ; va sint me co rowiv. Va Jacques meviele co pasuyur, voxe me co tir ke jin. Voldo in, is merodoluneson, rotir wan co batcer, pokoleson va lokiewe. Va Jacques me bogé. Va lanera va kotafa danura pu bat ayik cinon coen bogé. Voxen va Marthe renarsá nume me rokrupté da cinafa kaluca tir gomilafa. »

Belcon borev kire anton tiv rumeik dadis va abiccoba. Ilwalera va Marthe ! Larde ine tir ke metan, anton ke jin, mancoba co tir guldera bas jin, larde co zo solparsav. Ixam, va tena ke geja guzekav, i va tena titisa tela ke cinafa renara. Grupev, kore Marthe vogapar da va kotcoba jovleter, da va jin radimelanitir, pune me tí exusaf nume va int plekuson ika runda ke Marthe, va mana oviskafa mojoara me djuproguzeká. Marthe diver dume ruler guazarsafe. Arti sanalubda, jinafa blira biwe tozuwer, ayikya va jin renatad, i ayikya tisa ke inafa refa klaa. « Co gomejé, ~



~ ine loplekur. ~ Ede va jin fu jovlé, pune nopeon xonuketé. Ede fu zavzagil, pune to golde axuca askitil, numen wison va rin wetas va rinafa kaluca mejeté. »

Nekev jinafa exukera, va int saté da va vole nuruyensé. Voxen Marthe anton ker da fu zo buiver, numen beta jinafa lazavaja sedme ine nutir umafa. Ine dulzer : « Gue, va batcoba me al trakú. Pestalé da me rotuxadal. » Jin, nope kivara ke Marthe, pestalé da intafa odiakuca tir leon delafa. Acum jinafa vinura tid tulwafa. Anton golde doluca nudimcoé. Kalí : « Volgue, volgue, til oviskaf. » Kaxe ! Tí gustarsaf gu jotuca nume gonoguzeká da gu Marthe va int iliksantutú lanviele inafa jotuca omweter voxen tela jinafa rumbeter.

Beka jinafa rena va parmaf tazuk nuzomer, tire tir tec remgudaks. Kev bet lirk tuaxawer.

Kle, oviskaca ke cinyona gloga remi bat mielcek va cin al cuesid loon dam telyona ke cot. Bata va cin gu banyona al nutilded ; ae tire al tenuked. Wil, loote, dankad. Mielcekon al dankad. Va bata ezlafa rotuxara sonké : wil ba ticawaltara sodankar. Batcoba me tir zultaca. Jinafa klaa va mekenibera afanar. Voxen Marthe dere katcalar, akoyepenon eke ape bata toma me tir taneafa. Va jinafo po licaso va ine kev jin me ronarur, kiren inafa akoyenuca kowazder da ine va bata kaf mielcek do Jacques men al tiskir.

Viele ejadé, pune va cinafa rena gu burkaca krupté. Fotiv taneik pestales va lanyona skaltera, me grupeson da rena sotir dum ezlopa, isen kot fertik, don bet rotakapaf, fogetuwarzar. Pu Marthe kalí ( voxon mefolison ), jupason da ine trakur da va dalintafa bemuaca paká : « Va jin iskedatal, are ayikye va rin puveted », va int nurulaner. Jin, voxon, loloon toz lané da zavzagití, dace viele titir leon jotafe, kiren jinafa vunguca ten askitir da cinafa kotabafa kaluca gu inafa fa rupteter.

Keniba va cin ton lebuca akoyer. Ba divmodera, wison da ine tir nisayane, kiva da fenter. Va inafa alto uzadá. Ino tir teyeso. Wira va inafa kenibera va jin cugeke tudreldar. Arti sanoya wexa, bata drelduca nutir tabina. Va Marthe kev epita kutcá. Ine me divmoder. Toleafa kutcara, leon rome yafa, ton tizuca ke surk tegir. Ine vagrabler, aze, itapragason, va jin gu kutcara besar, dum va kontel renan az katrasin koe ilava arti klokara va inafa awalkera. Ine, volson, va ageltaca al foklokar, nume ba divmodera va jin katrasir.

San-tane bartiv iexam tir. Va sabaxa uliv viele va mamlesiki gildev. Va Jacques vere trakú : « Warivode in va ervo gir. » Beka awalkera va jin cugeke kovudar, pune me skotcé. Volson, co nalé da to Jacques co tir, ant ede va cin co fu aytar. Kotara tenekara cwe co tir kipeafa.

Guzekara va awalk ton auluca tir zolonafa ant ede kontan ant guzekar. Awalkera ke volant toloy korik sometir awalk, dace sedme mefolisik. Nigesira tir volto bulura va blira, vox to bulura va tupestara. Viele lana rena sotir blira, toka amidaca wal belcafa blira isu awalkera tir ?

Me rovofo lí da tí gradilik, kiren trakuson da Jacques va ant Marthe oku jin rotir co fu aytar, va jinafa ketsuca sabé. Kas dace grupé da tela ke bata toloya piza tir loon rotafa ?

Larde Marthe me zekar, cwe al roklé isen mamlera tiyir to dene pilkotikeem. Voxen mamlesiki gin tauler.

— Amlital, me zekal !! ~ ine prejar. ~ To gadikya ape tir. Al vulkuckú da moi mista goworar.



Tí kalaf kir vrutadas va tana inafa wetara. Kotviele, vielu fertik ok nik tid gavemes ta kakevetca, pune sogestí da su awalked. Gason va bata polinda pu inafa gadikya, va inafa kivara froná isen da gan jinafa derka zo satoler.

Va budenu polku ke matela gildev, kadimi dokalira ( tire, Grangier W<sup>ya</sup> pu korik ke sidot al erur kase bak rielcek kontan va dalintafa nazbeikya co wiyir ). Marthe kaku telvung divdisuker aze kalir : « To ina tiyir. » Va rilitucaja me rotacagí nume, wison Grangier W<sup>ya</sup> dimmallanisa dem mistablikerak koe nuba is dwisa va merogildana gracera ke nazbeya, puvegú. Ina van budeyen telvungeem gin rwoder.

Re, va betcoba mea gojugemé nume pesté tumemalyawes. Va int vanolá da Marthe pu gadikya mewegayeson roderotuxadar, isen jinafa volfonkuca va mancoba pu ine culimer. Wori rena, sotisa ketsuca ke toloy korik, va kotcoba gu int sowetar ise va rotuxadara soblidar. Platin gan mil degrik, ware culimer da va artlanira ke kurenik al palser. Batvieli va intafa evayuca al sekiá, me djukugazason va Marthe. Jinafa olguca va aulaca aykar. Bré :

— Fure va jin ilkadetel. Tí dum kurenik, lion fikaf.

— In me tir fikaf, ~ ine kalir.

Ware dakí :

— Battode, va cin toloy coel, kalil da va in renal, til valeaf : arti anyustka, do in rovocoetel.

Kutcbugdar, borer :

— Va tokcoba lieke tuikorasa va rin al askí ? Vosé, va minaf taneaf vielcek ke kaluca me blokal, vay !!

Manteca vordava va askisik sobakad. Va koncoba ke intafa kalira vol trakú, neke vol lakalí. Pu Marthe vol rodivé da jinafa rena laumar. Ape va niaafa klaa zomer, numen bata zugafa nugera tir almotcera ke rena vanpisa ske. Mejé. Vosé da Marthe va jinyona dilfura di vulkur.

Pilkotikaf kwik va twa levo tuvel al fargier. Marthe narir. Toloya ke Jacques tigid. Wetce dulzara va jinafa iltrakura : « Raplekul inde djumel !! ~ ine kalir. » Tí kinokaf. Erú da di belir voxé mu int videter. Marthe, sundeson num lureskapason, va tana anamplekuxa sollipar. Twa tir volfakafa gu sollipara kir ape abrotcifa. Inafa zatca vanpir warzafa culimesa katectara. Va bata lureskara ilkadé, is va inafa titisa sidjera. Soe sugá nume, kuranison da ine va toleafa twa me di sollipar, unt sú da sedme bata nakila Marthe en tir ikorafe. Erumbon gan jin, belir. Sundaja va sollipara va taneafa twa al jupar, voxen volto sunda askir da ine kalir moida va toleafa su gixur : « Kelt gabler kiren va twa me al sollipat. Jacques dakter da kot udor koe inaf gabot su zo obukar, numen in abdi tanoy aksat me denlapitir. »

Ant rena va mana grivaderka roskaler.

Bat kurenik va jin toz funer, loeke co gokalobrav. Beta twa ke in bro utsala laizon tuzolonawer. Gaveon miafizestuv. Moni alube bartiv, ken kuksa gozav. Marthe zo akoydar viele va kita divwerdá, winon gan susik. Rupa va kita va ine deaseper. Va inafe vertove mea kiva. Laniv, mesonkeson va xariuca ke cinafa linulara, ton alto va sint kruso. Gelteem va sint



sint kevlícad. Bat taneaf awaltas taneaviel va yon gozasik dem bapledji al atrisir, milinde muvara va nyul. Korik grupes va Marthe vol rovekiavad ; voxen mesonkeson va koncoba, ine merovon kiavar. Gu fuglara ape torigid. Koerur ise djugrupe kane div mona al yaté. Kiper azen inafa vola tuorikawer ; bam va jin grewar, popon licason va jinaf gelteem, kiren jontikote al wupé. Daykatason va kita, va ine dimdenlaniv. Ae mu bata kita, va tena bagaliafa gu batyona stuva ton staksera pu ervolia witá. Voxen mana tena co lemisteper dume unt sú.

Marthe djumer da va Marne kal La Varenne di kenolaniv. Lente Rena Ewala sielestutuv. Abdiplekú da va Écu de France tcilaxe nedití, i va taneafa tcila wiyina bak jinaf rumeugal is baalpeyesa. Va batcoba dum dulapeksap pulví. Voxen viele rabatev da bata tcila tir liona, pune me djudosté da bateke al roklé. Va iwota ke Fulbert ! va kotcoba ! va betcoba al folí. Espú da va Marthe volgunon al kotcomé. Ine me gildar kiren me gikrandé. Ae, bata dempa va jin tukexar. Unt kalí : « Jin re folipis va rena ke Marthe, va kona tsabura rotir wití, dum Écu de France tcila ! »

Kire va inafa rena jontikviele iltrakú. Konakviele nué kase me tí virt mu ine, i rinta vere rojovletena viele dili va ine gu goni kimbatar. Wori, ~ unt kalí, ~ art ik iteem ba lanyon gemelt somerotuxad. Efe. Voxen vieli tel levonaf ayik tir grijaf, pune somibuegar ede va dalintafa trula iku vobor me nalet. Koe bata debala, tir puraf lieke ton sokack tir. Gemelt edje me rorotuxat dye tir viele cugeke girotuxadat, moekote pu int. Folira va ayikya « viele ina me rorotuxar » tir to folira va rolafa disuca ke totcidik.

Jinafa afaluca anton tir loon iyelakiraf tazuk ke jinafa ixakuca. Rulé leon opelkaf, neke arinde tí, larde beta klaa va ixakuca somedivvawar. Afaluca ke guazugal me tir beta. Bata drowigafa afaluca va kotcoba tove jin tuorikar, askir da va Marthe iltrakú. Kre, va int iltrakú, dace krupteson da me tí bagaliaf gu ine. Kore va kunoya wazdera va inafa rena co dadí, pune dun co tí volkalaf.

Va jwa somemuxana pu tel renanik grupersé, i va jwa somemuxana golde kivara va rumeafa tira, nume va bata awuzasa werkuca dene Marthe cubé ise mejedá kire va inafa swava me kofí.

Ba larde bartiv is acku sielon dimdenlaní. Gadikeem icde gozara koerur. Va Sénart aalxo seramon pimtá, is va inyona rucka jontolon ontinafa dum jin. Va Brunoy dere pulví, i va mepesa wida lize al miafizestuv. Laizon, gadya nulesa va jin nonur :

— Icdeon, René bak kielcek ba baleme bartiv batliz al lanir, nume al zo gevapar raveson da do rin miledje gozapayar.

Keron aundé. Bata stuva isu jontikara pu jin al raved da me grurotuxá neke amkemé. Kotviele zo dapnarí. Gadikeem va meka arcoba loplekur. Moron xultur.

**Oretlik koe alto**, ke Raymond Radiguet ( 6<sup>e</sup>-eafa zixa ; diza titisa koe diref otuk )

Oretlik koe alto : berpot (1923) ke Raymond Radiguet francaf suterotik  
 Xanto : *Le Diable au corps* francavon, kalkotavayano gan Laurent Lermigny, 2017.  
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>





## ERDVARK SPERDOL

*Orycteropus afer*

**Veem** : *Tubulidentata*

**Yasa** : *Orycteropodidae*

**Lum** : abrotce ke taka is alto vas 1 ik 1.6 m- ( ault vas 50 ik 70 cm- );  
ontine vwon ice epita vas 60 cm-

**Aldo** : 60 ik 80 kg-

**Ocagugal** : mon 7 aksat

**Occek** : 1 ( cugtode 2 )


**Sperdol** tir antafa blisa katca ke lorustayaf moukoldunolaf veem ( *Tubulidentata* veem ).

Mekar dunol gu sperdol me rodojer. Abica klubafa vekta kapbure bulol zo stragayad. Sperdol va abrotcafa taka is walzapaf pezay riwe akintaf dir. Pez tir rozekapas dem otsa vektasa vas bulolaf bwel lize koeon pezolkeem tir. Sperdol ins sopezbuder. Pezay tir dem cug almas imolk. Berga tir trelackafa isen alto zegodapafo. Ge tir soanafe isen altotsa tir reltapaf ault ekwon anamkolaf gu mon 40 cm- vox otson logemaf. Tir oltavafa gu ault ke kangurol. Oblakeem tir gijaf is tazuk vas tel ke barlubekdunol vektar ; abrotce ke oblaka tir vas 15 ik 20 cm-. Sulem va kota merupte-non rodekalizir ise suxason tuomar.

Lum ke bewa tir mialukaf kapbure alto. Abdueinieem tir popaf vox trelaf loon dam radimeinieem. Kota abdueinia va balemoy gelt sodir solve radimeinia va aluboy. Kotceem ke abdueinia tir gijarotipaf ise va suxara faver ; kotceem ke radimeinia tir lopinaf is legijaf. Zekapas yoy ke dunol tir bliopon zolonapaf. Tir abrotcaf ise riwe varon zo rodivartar ; tir azekackaf is alokon besan gu sobondafi fiani warzeni gan jontik fianiak. Tir vrebafa xeka ta gralamera va malestuna beza. Tazuk ke talga tir rustayaf kir akintakoraf, a zae is miza ; talgina tir dem lani-belcaf sodjey. Atrira ke talga dun tir isen kota talga tir besanafa gu tec tuwavaf brank.




▲ Sperdol tir aptaf bezatorik dalon malestus va frunku. Koe Afrika anton tigur. Va bumpaf tazuk ke taneakaf dunol sotir isen inafa remblira gan inafa katcalafa malestusa tuaptara zo nunekir.



▼ Abrotcaf sobondaf is romalatces yoy ke sperdol va gralamera va frunku benelon yordar.



▼ Irubaxo ke sperdol moe werdafa azekapa is afrikafa aala, vaxe lan seg ke bwaala. Koe meftavaxo, sperdol kale ontine vas mon 2000 m- rotigir.






Jadion katcaxo ke sperdol tir moe riwe varafa Afrika gee Saxara letaxo. Tigixo gan tigira ke frunku tisu intaf dalaf tor zo kipir. Meila is werdxo kle tid gelukafo irubaxe ke sperdol, voxen in koe aala dere jontiktode tigr. Suxasa rotira ke sperdol tir cugunaykafa tuke keskotapaf relteem ke abdueinieem is pilkovafa gijuca ke kotceem yordas va leakom voxis romalsaven ton nendaso ervo. Sperdol tir mielaf dunol nume va afizcek koe tawaz sye tiskir, i koe tawaz dere betviele tis gelbe voxis begama lize dunolya va oceem nazbar aze gaar.

Tuke kotcapeem, sperdol va delafa rebava ke frunkuak rode-dimvegedur, fradayeson ton xakola vas 30 cm- is aludeve vas 40 cm-. Viele frunku ko fraday orad, pune sperdol kan sobondaf yoyap deciton gralomber, i kan yoy rotabdumiman kal soluma vas 30 cm-, oke ko art rontion gelavar. Sperdol va frunku tigusu moe sid dive frunkuak voxis leote mical dere malestur. Toka dere tid tana rulda ke inafa malestura, i nelkon toka ke divlujatoraf liost.

Sperdolya va tanoy oc (cugviele toloy) sye nazbar. Sperdoloc sotir imiskaf ba koblira azen im bad tanda toz atrir. Toloya taneafa safta ke blira koe tawaz ze tiskid abdida oc do gadikya va tawaz toz divlanir. Ba baroy aksat, va beza toz malestur aze ba tandacku va pilkaf tawaz poke tel ke gadikya suxar. Va tor de gadikya jontikedje wan aneyar. Sperdolocy va gadikya ba toza ke diref nazbarugal nubulur voxen ocy loedje di zavzagir. Batdume va gadikya do toloy ecklaaf oc dile rowit. Sperdolye sotir antiafe, vaxeon bak nazbarugal.

► Sperdol tir gijarotif suxasik ise va erodaf tawaz vegeedur lize gu jontik volnik va int di nendar.



▲ Sperdol va baroya gijapafa pesta sodir : i va pezitca is uzatca (dalon kan pezay) is witca. Witca lezolonon yordar isen iteem tir benelon kalvekaf gu mielafa wira.



▲ Ordafa tila ke sperdol : modafa tila is anamsusa tila ranyesa moe radimeinieem dum kangurol.



▲ Sperdol va jontik volnik dikir : i va krapol is kramol voxis digdatol is plivol (koteriges va tawaz ke sperdol az vangis va oc kotviele gadikya me tigr).

◀ Tawavopafo tigixo ke sperdol tir mantafo voxe me tir dem letaxo is lindaxo voxis lanyono aalxo ke taltefa Afrika.



## TELIZ

2<sup>e</sup> bu : Sareon gu Abdiizvugal

48<sup>e</sup> bu : Oretlik koe alto, berpot

54<sup>e</sup> bu : Sperdol

56<sup>e</sup> bu : Kuda ke Aisopos

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

## Kotavusa virda

Virda kotavon sanelayana, nuyon is faston  
romalvajana is rorubiana is rotanamzilina.  
Ickriluyun rokeem. PAG / DE.

Internetxo : [www.europalingua.eu/KotavusaVirda](http://www.europalingua.eu/KotavusaVirda)

Bu : [www.europalingua.eu/KotavusaVirda/17-e\\_otuk\\_03-2024](http://www.europalingua.eu/KotavusaVirda/17-e_otuk_03-2024)

Sanegara : Bareaksat ke 2024. 17<sup>e</sup> otuk.

Yunkexa is ewava : ewaveem abugaf gu roka ok  
nuyon rotamuzen ok rictayan gan digisik.

1

Loma  
AWALKEXIK

NUYUCA



**Vasil Makux**  
(1927-1968)

Vasil Makux tir ukrainik va int teyvikeayas kevotceteson va kere-lera va Ukraina gan Sovietafa Tanara is va rossiafa tolgenira va Ceskoslovenska. Tici Toleafa Tamavageja, gan sovietafa rictaga zo koflinter aze sandon zo kopemaxoar.

Ba 05/11/1968, mal Krectcatik vavilapa ke Kiiv, van Meruptesuca Viga iegason : « Va doevaf tuboniasikeem lubesit !! Va nuyafa Ukraina blit !! Va Ukraina blit !! » aze va int vikear.

Vasil Makux - Nhât Chi Mai - Homa Darabi - Jan Palach - Bobby Sands - Mohamed Bouazizi

## Taneatomon win wegidol

Viele ayik va wegidol taneatomon wiyir, pune vudeyer nume, pedran gan ontinaltopo, yateyer. Voxe darpeon sonkeyer da in sotir zijnaf, pune tulaoweyer ise vanlaniyir. Azon, vofason da sulem somezider, in vliguyur eke fexayar ise ta jupara pu rumeik nafeyer.

Bata kuda nedir da giltira va kivara ke mayakaca sotuvumeltar.

Kuda ke Aisopos, -VI<sup>eafa</sup> decemda ( kalkotavaks gan Yurani Andergan )